

東
華
續
錄

東華續錄

臣王先謙

臣周瀚蕃恭校

乾隆四十年乙未春正月庚戌諭額駙等向俱照公主封號授爲固倫額駙和碩額駙惟公主所生之子未經定例賞給品級此內如下嫁蒙古王公之公主等所生之子本各有應得品級無庸另爲辦理至在京公主所生之子若不授以品級於體制殊未允協嗣後在京公主所生之子至十三歲時係固倫公主所生卽給予伊父固倫額駙品級和碩公主所生卽給予伊父和碩額駙品級見在豐紳濟倫年已十三卽著賞給伊父和碩額駙福隆安品級著爲例○辛亥諭湖廣提督李國柱陛見來京於十二月二十四日召見略詢地方情形因諭汝尙未至老邁可仍回任語未畢彼

卽奏請於新正初二日請訓仍告假掃墓以其言不近理願而哂之卽令其出俾其自知省悟乃卽竟於昨早具摺告假而去可謂不知禮之甚者矣外省提鎮來京每有召對時經朕諭令回任或有再三懇請多留數日者雖未必盡出於中誠然在臣子奉上之義自應如此今李國柱旣請陞見入都乃甫一召見輒思回任且正值新年凡朝覲至者均集於此而該提督遽以回籍掃墓爲請太覺不識輕重朕宵旰勵精辦理庶務從不稍輟時刻或遇軍報要件卽除夕元旦何日不召見軍機大臣降旨籌辦並不因令節少嫌煩碎至臣下乞假私情且係拜掃之事豈新春所宜言李國柱不過因在京多住一日恐略添用度遂爾卽欲告假冀圖省費竟置大體於不顧所見實屬猥瑣况伊在提督任亦非出色之員卽如楚兵在川省軍營者前據富德奏稱衣履不全皆由楚省解

送遲延所致雖非李國柱專責既爲提督則通省之兵何一非伊
所轄亦應向陳輝祖豫爲商酌以供接濟乃竟視同膜外且此事
朕尙未問及彼乃急遽請回任若此尤屬不合李國柱著交部嚴
加議處○庚申諭前據弘昉等奏查審逆犯呂留良之孫呂懿兼
曾孫呂敷光捐納監生一事係戶部辦理錯誤見已另降諭旨至
檢閱刑部原議作爲另戶之案竟係錯會朕旨朕前諭令將發遣
之曾爲職官及舉貢生監出身者免其爲奴於戍所另編入旗出
戶當差係指尋常爲奴遣犯而言其真正反叛及強盜免死減等
人犯原旨卽在開除不辦之列若呂留良子孫係大逆重犯緣坐
卽屬反叛豈可援輕罪有職人員槩免爲奴出戶致令逆惡餘孽
得仍竄籍良民實不足以示懲創而申法紀卽如此次王倫之族
設有舉貢生監亦免其爲奴出戶乎著交刑部存記嗣後如遇辦

理此等大逆緣坐之案不特舉貢生監不應減免卽官職甚大者
既爲逆犯子孫罪在不赦亦不當復爲區別所有呂懿兼呂敷光
二犯前既倖爲開戶今復妄思潤廁衣冠情罪尤爲可惡若僅照
該將軍所擬永遠枷號罪及其身而止尙不足以蔽辜著將該二
犯及其家屬俱發往黑龍江給與披甲之人爲奴○諭向遇上元
節例穿蟒袍三日今年正月十六日適屆月食雖月食非日食可
比爲春秋所不書但究關垂象之義亦應昭敬是日著止穿常服
其蟒袍改於十七日補穿所有應行筵宴亦著改於十七日○諭
軍機大臣等向來各省學政三年差滿該督撫固有將其任內考
試聲名若何具摺覆奏者亦有竟不奏及者至其辦事才情若何
是否足供任使則槩置之不論殊非爲國家留意人才之道學政
在任三年與督撫相處近而且久其優劣知之最眞不特考試之

是否公當教士之能否實心督撫當不時訪察卽其心術才具亦無難體驗而知且學政中可供簡擢者頗不乏人如韋謙恆閔鶚元蔣元益諸臣或於巡幸召見賞識並證以督撫之言或於復命時詢察記名漸加甄拔見俱用至大員其由督撫特奏密薦者不可多得豈避嫌不辦抑視學政爲無足重輕易而忽之耶著傳諭各督撫於該省學政留心體察儻有考試不公不法之事自無待其年滿卽應隨時參劾其餘在任三年或學問優長不愧師儒之席或僅循分供職止堪勝任者或有才識明敏通曉吏治可用爲道府及兩司者各督撫各就所見秉公據實密奏毋得稍涉偏私所有見在換回之各學政卽照此旨分別覆奏將此於各督撫奏事之便諭令知之○甲子 上臨和靜固倫公主第酌酒○還宮視 皇貴妃疾○丙寅諭軍機大臣等近日閱米芾墨蹟其紙幅

有勤有二字印記未能悉其來歷及閱內府所藏舊板千家注杜詩向稱爲宋槧者卷後有皇慶壬子余氏刊於勤有堂數字皇慶爲元仁宗年號則其板是元非宋繼閱宋板古列女傳書末亦有建安余氏靖菴刊於勤有堂字樣則宋時已有此堂因考之宋岳珂相臺家塾論書板之精者稱建安余仁仲雖未刊有堂名可見閩中余板在南宋久已著名但未知北宋時卽以勤有名堂否又他書所載明季余氏建板猶盛行是其世業流傳甚久近日是否相沿並其家刊書始自北宋何年及勤有堂名所自詢之閩人之官於朝者罕知其詳若在本處查考尙非難事著傳諭鍾音於建甯府所屬訪查余氏子孫見在是否尙習刊書之業並建安余氏自宋以來刊印書板源流及勤有堂昉於何代何年今尙存否或遺蹟已無可考僅存其名並其家在宋時曾否造紙有無印記之

據或考之志乘或徵之傳聞逐一查明遇便覆奏此係考訂文墨
舊聞無關政治鍾音宜選派誠妥之員善爲詢訪不得稍涉張皇
尤不得令胥役等借端滋擾將此隨該督奏摺之便諭令知之尋
奏據余氏後人余廷勤等呈出族譜載其先世自北宋遷建陽縣
之書林卽以刊書爲業彼時外省板少余氏獨於他處購選紙料
印記勤有二字紙板俱佳是以建安書籍盛行至勤有堂名相沿
已久宋理宗時有余文興號勤有居士亦係襲舊有堂名爲號今
余姓見行紹慶堂書集據稱卽勤有堂故址其年代已不可攷報
聞○丁卯諭嗣後 大祀隨從執事人員止准本身由午門前乘
馬其家人馬匹不准由闕門牽入○庚午以四川大功指日告竣
撥部庫銀五百萬兩豫備善後事宜○甲戌諭據阿桂等奏到攻
克康薩爾山梁占獲碉寨木城石卡並肅殲賊番情形一摺據稱

賊番於康薩爾守禦不遺餘力因於本月十二日分派將弁帶兵
黃夜前進拽開欄木拔起鹿角躍過城濠拋擲火彈賊人抵死拒
守官兵一呼湧上直登礮頂殺死礮內外各賊並將地窖石板踏
塌壓斃多賊隨將地穴填塞繼又分兩翼衝下連奪大礮石卡木
城至山脊兩旁見係密箐黑夜難以進攻連夜擊柵運礮轟摧連
日各兵勇氣倍增四面環攻賊人無路可逃俱從懸崖跳下跌斃
者又復甚眾所有山溝內水礮寨落一齊搶占三日內共攻克大
礮十座木城四座大石卡二十座寨落七處活擊二賊殲斃二百
餘賊奪獲銅鐵礮二尊刀矛鳥槍毛毯糲粃甚多再此處係進攻
噶爾丹寺及噶朗噶勒烏圖正路見在察看情形於兩三日內攻
取勒吉爾博以期迅抵賊巢等語此次將弁兵丁奪卡殲賊勇往
出力甚屬可嘉所有出眾超羣之將領經將軍等另摺保奏者業

經分別加恩賞給巴圖魯名號又超擢升等賞翎以示鼓勵其在
事出力兵丁並著查明各賞一月錢糧○乙亥 上視 皇貴妃
疾○丁丑 皇貴妃薨諭本月二十九日皇貴妃薨逝著稱令懿
皇貴妃依例輟朝五日派皇六子皇八子皇十二子皇十五子皇
孫綿德綿億綿惠九公主額駙拉旺多爾濟扎蘭泰及丹巴多爾
濟豐紳濟倫穿孝並派皇六子尙書永貴總管內務府大臣金簡
總理喪儀所有應行典禮著各該衙門察例具奏○ 上至吉安
所 令懿皇貴妃前奠酒○戊寅 上至吉安所 令懿皇貴妃
金棺前奠酒

二月己卯朔阿桂豐昇額色布騰巴勒珠爾海蘭察額森特奏正
月十六日進攻堪布卓寨分兩翼潛進合圖及賊番知覺我兵已
豎梯而上據碉房之頂賊眾竄走無路皆爲刀箭所斃十七日進

攻甲爾納寨該處賊番已被官兵截斷正用皮船偷渡我兵追擊均落水淹斃其前後碉寨及沿河崖洞同時攻克又奏獲奸細朗木太供賊欲於康薩爾等處偷截官兵後路以伊係沃克什人官兵必不動疑使偵探信息等語種種詭譎實堪痛恨諭軍機大臣等阿桂等奏攻克甲爾納堪布卓沿河各碉寨情形甚屬奮勉可嘉據稱豎梯而上想係所帶雲梯卽此可見平時演習之效其先登者爲誰著卽查明據實具奏以便加恩示獎此兩處攻得已至沿河一帶官兵汲飲有資卽可乘勝直取得式梯進剿勒烏圖其勒吉爾傅山梁礪卡若能相機攻得於進取更爲有益至已攻得甲爾納對河卽係斯年木咱爾與明亮軍營更近阿桂等固可隔河用礮轟摧明亮等亦可約會就近設法夾攻若能併力攻得斯年木咱爾於進攻勒烏圖尤爲得力至所稱攻碉時索倫佐領伊

爾賽因攻撲傷亡甚爲可惜其都司梁朝桂等先登受傷亦屬可
憫並交阿桂等將陣亡受傷弁兵一併查明咨部議卹至盤獲奸
細朗木太必係阿桂窺破其狡譎情形逐一嚴訊方能得實他人
並不能如此用心阿桂旣辦及此則各處投出之人將軍參贊等
不可不留心體察如有形迹可疑者卽當嚴詰得實勿爲賊番所
愚至阿桂另摺所奏議調南路等處兵七千名會攻宜喜山梁所
見甚是與朕前次所降諭旨適合絨布一帶見雖駐兵牽綴賊勢
但明亮西路之兵若能攻進卽可由馬爾邦一路夾攻取勝引進
南路之兵同勦噶拉依惟其地甚關緊要亦須勇幹大員統兵駐
守富德自不便輕離該處著傳諭富德卽速酌量抽撥○壬午諭
軍機大臣等今日富德摺到不過將所放夾壩之賊殲戮數人據
此看來富德所領之兵斷不能前進與其將一萬數千人爲牽綴

賊番之用何若分助明亮之爲得濟乎富德若以兵少不敷派撥致有貽誤則獲罪重大矣著傳諭富德速派兵六千名前往明亮軍營仍帶餘兵用心駐守如遇窺探賊番盡行剿殺儻有疏虞或令賊番少得便宜亦惟伊是問○癸未 上至吉安所臨送 令懿皇貴妃金棺移奉靜安莊○甲申 上御經筵○丙戌諭軍機大臣等阿桂等奏攻克沿河斯莫思達碉寨乘勝深入自屬更便阿桂等尤當設法妥速辦理佇聽捷音又富德奏南路見在情形防範亦屬緊要自不便過於多撤或致兵力太單且所請抽撥三千兼之章谷抽派一千合以宜喜日旁原有之兵可得七千餘人足敷進剿之用卽著照富德所請准其撥兵三千前往宜喜協剿至絨布一帶甚關緊要富德未可輕離卽興兆舒亮均係南路得力之員該處將領無多亦不宜再行分派著富德仍在絨布寨駐

守其派往宜喜之兵止須選派章京等率領並著明亮於奎林和
隆武三保內酌留一員同舒常駐紮帶石以緩賊勢仍於此內酌
派二員星馳前往南路一帶迎見抽撥之三千兵帶領遄行明亮
亦卽選戰兵數千迅赴宜喜部署一切俟南路之兵一到相機設
法進攻以期必得○丁亥以故和郡王綏倫弟綏倫襲爵○己丑
命贈諡 皇貴妃爲 令懿皇貴妃○癸巳諭李湖前在直隸道
府任內辦事頗屬認真朕特加賞識彼時直隸大員如方觀承周
元理於實力辦公之外尙各兼辦差務惟李湖在直則專留心地
方吏治似不以辦差爲急務而其受朕鑒賞轉在此也是以加恩
擢用自應倍加奮勉以副委任乃自簡任滇撫以來諸事遠遜於
前卽如籌辦銅斤酌撥銅款等案屢經戶部指駁其不能實心任
事可知雖節次傳旨申飭念其尙屬因公錯誤暫爲姑容今彰寶

於保山縣王錫取用什物等項計銀至四萬餘兩之多李湖同在滇省豈竟漫無聞見乃隱忍緘默從無一字奏及其心尙可問耶各督撫在任如有貪婪劣蹟固不能掩兩司耳目然朕亦不肯以此事責之兩司若督撫同在一省則彼此皆當互相稽察今彰寶在滇狼藉若此李湖不據實劾奏實難辭咎吏部議以革任自屬分所應得李湖著革任帶布政使銜自備資斧前往四川軍營會同鄂寶等辦理軍需奏銷事務以觀後效其雲南巡撫員缺著李瀚補授所遺江西布政使員缺著楊魁調補安徽布政使員缺著李質穎補授其巡視兩淮鹽政著伊齡阿去淮關監督事務著寅著管理○乙未諭軍機大臣等富德自到絨布以來爲日已久乃每次奏稱殺賊而仍然株守其所奏痛殲賊眾特不過虛張粉飾之詞敷衍塞責於軍事全然無益而阿桂調兵又不肯如數發往

是誠何心富德乃獲重罪之人朕曲加寬宥復畀以參贊大臣重任伊自當感激朕恩協力同心不存私意以冀成功乃止爲一身之計殊屬不堪富德著傳旨嚴行申飭○以秦雄飛爲湖北按察使由甘肅驛傳道遙○丙申諭軍機大臣等南路調兵一事昨已詳晰飭

諭富德並令阿桂一面妥酌辦理一面奏聞矣阿桂請調南路兵六千之摺於二月初一日奏到隨即傳諭富德遵辦乃於三月十四日據富德奏南路止能抽兵三千名若令其自行帶往止須兵二千已隱然有不願抽撥之意同日復據奏攻碉殺賊情形尙冀其或可由馬爾邦架入若竟能得手原不必拘定何路因諭令再行酌量如自度能從馬爾邦直進卽三千兵亦不必撥否則速行如數撥往宜喜應用計此數次奏摺與諭旨往來展轉已一月矣行軍勢懸呼吸豈容如此羈延計富德初接阿桂調兵之札不過

在正月二十以外彼時卽不能照依所調全數撥往亦應一面迅速具奏一面抽兵三千卽行發往若果如此則是以國事爲重不存畛域朕必嘉許之乃富德不但不卽奏辦且於三千二千雙請之時似欲候朕批答再行照辦似此延誤而月富德已咎無可辭矣參贊大臣遇有應辦軍務原不妨與將軍彼此商酌若參贊有觀望誤公之處將軍亦應隨時劾奏乃阿桂奏止言富德混撥兵數之非而於此一節轉不查參贊屬非是著傳諭阿桂將富德不卽發兵前後遲誤緣由迅速查明據實參奏見在各路進攻實惟阿桂一路最爲可恃且阿桂所攻之西路礮非不多路非不險而阿桂節節仰攻層層越險所至克捷今距噶爾丹廟及勒烏圍不過七八里實非明亮富德等所能及伊等返衷自思亦當各知愧而設使阿桂此時頓兵不前並羅博瓦格魯瓦覺尙未能過亦如

富德之阻於庚額特而不進朕必治阿桂之罪功過具在難掩眾人耳目並非朕偏向阿桂過於獎譽之也朕此時所盼實惟阿桂一路統兵速進搏穴擒渠著傳諭阿桂卽速妥籌進剿迅成大功以膺懋賞○吏部議奏原任湖南按察使農起於全與伯誣告全淑士踢死伊母一案錯擬絞罪請照失入例降二級調用得旨向遇吏部議處司道等降調之案俱量予從寬留住者多此案全與伯誣告全淑士踢傷伊母身死該縣率驗屬實錯擬絞罪由州申解該司農起並不詳加確勘率行轉申若非全淑士翻供經撫臣駁飭全與伯自行投首則幾成冤獄人命重情失入較失出尤重臬司爲刑名專責錯誤若此咎無可辭農起卽著照部議降二級調用以示懲儆且使凡爲臬司者聞之咸知詳慎自懷克副明刑

○戊戌諭朕偶閱宋范鎮東齋記事內載成都府學有周公禮殿

及孔子像其上壁畫三皇五帝及三代以來君臣卽晉王右軍與蜀守帖所求三皇五帝畫像一則其制相傳始自秦漢至北宋開一千五百餘年歷久尙存范鎮此書作於宋元豐中至今不過六百餘年不應蹟竟湮沒著遇便傳論文綬令其就近查訪如該處畫壁見存卽照樣摹繪呈覽如或舊蹟難稽亦卽據實覆奏尋奏周公禮殿遺址據志書昉於西漢東漢時蜀守高朕有禮殿記刻柱上壁畫三皇五帝三代聖賢及兩漢君臣像歷宋元尙存至明末學宮毀於火范鎮所記石室碑柱湮沒無考報聞○乙巳上至靜安莊 令懿皇貴妃殯宮奠酒

三月辛亥 上啓鑾幸盤山○諭截留河南山東漕米十萬石撥補直隸天津等府屬倉穀○甲寅 上駐蹕盤山○癸亥 上還京師○丁卯吏部議准陝西巡撫畢沅奏漢中府留壩通判請改

爲撫民同知兼管捕盜水利從之○戊辰諭國史館進呈所纂王
鴻緒列傳於左都御史郭琇劾鴻緒與高士奇招納賄賂等案僅
敘大略而郭琇原疏未經載入恐傳之後世其不知鴻緒輩之罪
狀者妄疑一劾卽去或有屈抑其知者又疑秉筆之人意存袒護
不肯顯暴其短豈朕特命另修史傳之意乎夫王鴻緒高士奇與
明珠徐乾學諸人當時互爲黨援交通營納眾所共知如郭琇所
劾諸事並不爲枉而我皇祖不加窮究僅予罷退蓋於明珠念
其曾有襄辦討平吳逆之勞而王鴻緒高士奇諸人則因文學尙
優宣力史館是以屢下明詔剴切曉諭曲予矜全實由我皇
祖聖德然卽以諸人事蹟而論雖有交結納賄之私亦止於暗爲
關照不至勢焰熏灼生殺擅專如前明嚴嵩輩之肆奸蠹國陷害
正人此亦人所共知也卽如郭琇參劾明珠王鴻緒諸人後旋經

皇祖特加任用未聞有能稍事排擠者卽其後郭琇於總督任內因他事罷官亦由其自取並非諸人之所能媒孽又實由我皇祖聖明是郭琇原疏於諸人被劾款蹟皆當據事直書不必稍爲刪節使天下後世曉然於王鴻緒輩之罪狀如此郭琇之鯁直如此其後之自取罪戾如此並敬悉我皇祖之仁智並用措置得中又如此旣可令海內傳爲美談且足令朝臣共知鑒戒其於世道人心甚爲有益何必曲存隱諱乎其明珠本傳前已降旨改修外著交該館總裁將王鴻緒徐乾學高士奇等列傳覆加覈訂所有郭琇原劾諸疏悉載入傳內另繕呈覽其餘有類此者並著一體詳載以示大公而昭傳信

夏四月戊寅朔諭軍機大臣等阿桂派令海蘭察前往宜喜會同察看進兵路徑約期會攻深合行軍機要而海蘭察往來相度實

爲出力著將營中所有大段賞給二匹以示獎勵至舒常請同赴
宜喜進攻亦屬甚好其日旁一帶據奏留舒景安都爾嘉駐彼照
應雖係牽綴賊勢但亦須熟悉地利之人方於事有益因思永平
馬彪二人在宜喜駐兵已久於防範情形必能熟悉著明亮於此
二人內酌派一人同舒景安都爾嘉在彼防守以更妥協仍將派
出何人之處附便奏聞○甲申諭朕每遇郊壇大祀必親詣行
禮歷四十年如一日弗敢稍有懈弛一切儀文典禮悉本誠敬之
心仰期昭格凡諸升降拜獻弗愆於儀實有可以自信者惟是
行禮時諸皇子向不在陪侍之列無由知朕恪恭將事之忱著於
本年冬至南郊令諸皇子在旁侍立敬謹觀瞻祀事既蒞並令
就壇位前恭閱朕所進之爵皆安奉端正無稍偏欹俾共體朕
所以展精禋而答鴻貺者實在乎是其敬承毋忽○乙酉諭

額駙色布騰巴勒珠爾自往四川軍營以來帶兵打仗甚屬奮勉
所有色布騰巴勒珠爾親王之爵著加恩賞還○丙戌諭色布騰
巴勒珠爾以固倫額駙久侍禁廷稟性篤誠恪勤夙著前者西陲
底定懋建功勩此次派往川省軍營爲參贊大臣董率將弁奪隘
攻碉屢彰勞績擬俟功成奏到日茂賞策勳聞其舊疾復發勢甚
委頓實切廑懷因復其親王封爵用昭恩眷並遣乾清門侍衛偕
伊子鄂勒哲特穆爾額爾克巴拜帶同御醫馳往診視以冀速痊
茲遽聞其溘逝深爲軫惜加恩賞內庫銀三千兩治喪派總管內
務府大臣都統邁拉遜經理其事仍著伊子前往迎喪其歸櫬所
經並著沿途地方官照料護送尋予祭葬諡曰毅○己丑 上閱
健銳營兵○辛丑調景福爲兵部右侍郎由盛京工部侍郎調○壬寅賜吳
錫齡等一百五十八人進士及第出身有差○阿桂豐昇額額森

特奏宜喜進攻爲此時緊要關鍵必須木思工噶克及得式梯兩處同日攻打賊人必難接應勒吉爾博山梁自上而下過木思工噶克丫口突起一峰上有木城一座大礮三座互爲犄角一得此處則其下山脊各礮可順梁下壓臣等於十三日派書麟格勒爾德等攻木思工噶克丫口礮卡副都統額爾特侍衛那木扎等攻羣尼正面礮座侍衛巴三泰等從旁攻打賊悉力抵禦勒吉爾博山梁及沿河一帶之賊來援官兵攻至辰刻始行酌撤是日臣阿桂卽將攻打木思工噶克丫口官兵部署派烏什哈達瑚尼爾圖等攻搶丫口山峰木城礮座副將曹順等攻取山右礮座侍衛穆哈納等攻取山左礮座副都統福珠里倭昇額書麟總兵特成額海祿等帶兵各路接應總兵官達色劉國棟烏爾納等截殺各處援賊富興保甯等攻打勒吉爾博山梁中間寨古羅木礮寨以爲

牽綴並豫備木植俟得手趕擊木柵臣豐昇額額森特亦於是日將沿河官兵部署臣額森特同侍衛那木扎等攻搶羣尼礮寨副都統額爾特侍衛彰露等從左合攻總兵仁和攻打來珠寨落副將西德布等從旁攻打遊擊靈山等攻打沿河各寨於十四日子刻前進臣阿桂豐昇額分路督率調度其攻打木思工噶克山峰各官兵烏什哈達等潛越攀登槍石齊發遊擊梁朝桂等先搶東北隅大戰礮一齊擁入參將國興等衝入勦殺攻獲木城穆哈納等將山峰左右礮座同時攻克其餘官兵從康薩爾直至丫口山峰一帶連擊木柵占據至攻打沿河礮寨之兵均攜木柴堆積羣尼寨下放火延燒賊多燒斃北路官兵先於十二日進攻甲索搶獲大礮九座石卡一座至丫口正路上雖有賊人礮卡將大礮運往轟摧不難克取一得此數處礮寨即可直壓勒烏圖諭阿桂等

奏分攻榮噶爾博下面木城又攻克木思工噶克丫口碉座官兵
卽從康薩爾直至丫口一帶山峰連擊木柵占據至北路明亮之
兵先於十二日進攻甲索搶獲碉座一日而收三年未竟之功將
軍等調度有方將領弁兵亦俱實心奮勇甚屬可嘉所有阿桂豐
昇額等及在事出力之將弁兵丁俱著交部查明議敘其尤爲出
力之三等侍衛穆哈納參將國興遊擊梁朝桂俱著加一等卽行
升用○癸卯明亮舒常奏自初九日天氣放晴酌派數成帶兵於
十二日先攻甲索參領噶塔布接應將要隘三碉立時攻破又搶
占左右兩山賊碉七座接連俄坡之東山賊碉四座亦經占據前
後奪取戰碉一十四座甲索得手則宜喜一路更覺勇氣倍增查
達爾圖以下得楞一帶山岡綿延二十餘里碉卡甚多隨派科瑪
進財保分攻得楞三碉三保和隆武奎林珠爾格德等分隊上攻

烏爾圖納遜帶兵在後其向東山骹下臨河處有賊碉聯絡其間令福康安佛倫泰斐英阿帶兵攻取十三日陸續進發臣海蘭察帶兵策應得楞各隊臣明亮舒常於達爾圖木克什等處分頭督率旋見三保和隆武等官兵各將所指之碉先後攻克並克獲附近石卡數座福康安等搶奪石卡二座後乘勢壓下復奪石卡一座見官兵各將所得地方嚴爲守禦及從溝內前去之路惟達爾圖前廠及至得楞因地險難克然得楞以下各碉卡被我搶占賊人失勢臣等將後兩起新調川兵於十三日已刻催集上山剋日直下河沿非惟達爾圖等處賊人立見竄散卽沙壩山喀爾西等處皆已攔截在內自可不攻而得諭明亮等奏攻克甲索宜喜並統眾下壓各情形將軍參贊等調度有方將領弁兵俱能奮勇出力甚屬可嘉著交部查明議敘總兵教成統兵攻克甲索尤屬

勇往超羣著賞給僧格巴圖魯號以示獎勵○乙巳明亮海蘭察奏十四日臣海蘭察及奎林和隆武福康安等率將弁分路從薩克薩谷同時並進將薩克薩谷山梁全行攻獲於各要隘分布埋伏番眾乘夜上山搶奪新立營盤俱爲我兵擊退至十五日達爾圖得楞沙壩山各處賊人棄碉潛竄我兵追殲無算是日辰刻阿桂將豫備船隻運至河干往來渡戰當經福康安佛倫泰等帶兵將斯年木咱爾及斯聶斯布羅兩處寨落悉皆攻克自東至西環山五十餘里各處寨落接檢無遺見又飛調日旁留守舊兵併力前進論軍機大臣等此次攻剿得勝明亮調度有方海蘭察福康安尤爲出力均屬可嘉明亮福康安俱著授爲內大臣海蘭察前此已授內大臣著賞給御用荷包以示鼓勵俟大功成時自有殊恩懋賞見據明亮等按查該處五十里內所有數百餘寨落並無

糧石存貯賊眾之乏食可知今兩路大兵會合自即乘勝深入埽穴擒渠佇聽捷音

五月己酉召朱珪來京以黃檢爲山西布政使農起爲山西按察使○庚戌諭前總管內務府衙門奏商人義和泰呈請展限交銀一案因其事尙屬可行已依議矣是日召見金簡詢係何人收呈奏稱不知何人接收數日後召見邁拉遜詢及此事奏係六阿哥收呈交衙門公辦又數日復詢之英廉則稱忘係何人所收各等語衙門中同辦一事豈有不知呈所從來及遺忘何人收呈之理不過邁拉遜據實覆奏而英廉金簡不免含糊隱諱耳蓋英廉金簡在內廷年久心靈曉事明知阿哥不應收呈恐言之與阿哥有礙故不肯明言殊屬非是英廉金簡俱著交部嚴加議處皇子派令辦事如無過失大臣等必不能造言誣陷設有其人斷難逃朕

洞鑒亦無從逞其伎倆若行事稍有不合又豈大臣等所能瞻顧
隱騎至六阿哥派管內務府事收呈本非其所應爲恐相沿日久
跟隨阿哥人眾或有潛行藉端需索之事究於阿哥聲名有損不
可不防其漸並將此通諭知之○壬子明亮奏本月十六日由基
木斯丹當噶下歷東南因連日大雪暫停進兵二十一日派奎林
等分路進發我兵奮勇爭先殲賊甚眾各處山巖寨落焚燒一空
至敖成見在甲索帶兵下壓將俄坡木克什一帶碉卡占據海蘭
察等復帶兵赴西路協剿從此可迅擣勒烏圍諭軍機大臣等明
亮等奏攻克基木斯丹當噶山巖賊碉所辦甚好奎林等攻碉出
力均屬可嘉統俟攻得勒烏圍一併交部優敘見在阿桂等統兵
自木思工噶克下壓計日可得噶爾丹寺明亮進至臨河自必於
勒烏圍對面搭橋過河兩路會合夾攻勒烏圍自可剋期攻克佇

聽捷音○甲寅諭據阿桂等奏官兵攻克下巴木通碉棚將勒吉爾博一道山梁上下碉卡埽清及乘勝占奪得式梯官寨並分兵攻克柴噶爾博山梁碉卡焚搶噶郎噶勒赤爾等處寨落共計攻克大碉一百數十處木城數十座寨落二百餘處寨房一千數百間殺賊三四百名生擒賊十名奪獲礮四位及牛羊鳥槍等物見在連擊木棚用礮轟摧自可卽日埽巢等語阿桂等督率將士奮勇進攻所至克捷甚屬可嘉所有將軍參贊及領隊大臣等統俟攻得勒烏圍時一併交部優敘其在事出力之將領弁兵等卽著阿桂查明分別等第咨部議敘○丁巳諭前以促浸賊番黨助逆暨抗拒王師均屬罪大惡極曾屢諭將軍參贊若我軍業已乘勝深入賊番窮蹙難支出而乞命雖投降亦不可輕宥今阿桂明亮兩路官兵計日可以合力會剿迅埽勒烏圍兼可直搗噶拉依鼠

黨狐羣自必立就駢戮但爲數究不免稍多朕仰體上天好生之心有所不忍且此輩番人勢窮食乏尙爲其酋捨命固守亦頗足取是用網開一面施法外之仁著將軍等於進兵時豫行宣諭賊眾如有能畏罪出降者仍從寬免死儻或怙終不悛於埽蕩賊巢時玉石俱焚難以復追並將此通諭知之○以京師糧價稍增命撥倉米給五城平糶○明亮舒常奏本月二十三日令奎林等帶兵分左右兩翼攻破沿河賊碉副將圖欽保攻克茹寨縱火焚燒沿河各寨賊番死者甚眾麥田十餘里盡爲我得至甲索碉卡三十餘座均經赦成逐漸攻克該處守兵不敷臣等在大營抽撥四百餘名前往協守不日即可蒞事報聞○戊午定滿洲卹廕人員發交軍營學習例○己未以早命禮部祈雨○辛酉諭前曾命倣朱子通鑑綱目體例纂爲明紀綱目刊行已久茲披閱葉向高集

見論福藩田土疏所敘當日旨意之養贍地土原給四萬頃卿等
屢奏地土難以湊處王亦俱辭今減去二萬頃云云則福王當日
所得之田僅二萬頃今綱目載福王常洵之國條云賜莊田四萬
頃中州腴土不足取山東湖廣田益之與向高言不合又所載青
海朵顏等人名對音沿用鄙字與今所定同文韻統音字及改正
遼金元國語解未爲盡一是張廷玉等原辦綱目惟務書法謹嚴
而未暇考覈精當尙不足以昭傳信著交軍機大臣卽交方略館
將原書改纂以次進呈候朕親閱鑒定其原書著查繳○封禁廣
西由村隘口○阿桂豐昇額奏榮噶爾博之第八九峰下卽係勒
烏圍中隔噶爾丹寺及噶朗噶兩處形陡地險若於第三條山巖
連擊木柵而下一到河邊則噶朗噶及噶爾丹寺不攻自破遂於
二十九日一面督兵砍木植接擊木柵一面分兵擊賊殲斃甚多

我兵連拏木柵十七座已至山巖中間焚燒餘積礮寨十餘座復
派伍岱等帶兵由噶爾丹寺上面分路攻噶朗噶官兵所至騰躍
而登進至噶爾丹寺初二日復接拏木柵九座至沿河平壩痛剿
賊眾一兩日內卽可埽淨噶爾丹寺噶爾噶二處從此攻克榮噶
爾博第八九峰順下直徧勒烏圖賊巢○壬戌李瀚卒以裴宗錫
署雲南巡撫李質穎護理安徽巡撫○以朱珪爲侍講學士

原任山西

布政使

○甲子諭昨因明紀綱目考覈未爲精當命軍機大臣將原

書另行改輯候朕鑒定因思綱目三編雖曾經披覽但從前進呈
之書朕鑒閱尙不及近時之詳審若通鑑輯覽一書其中體例書
法皆朕親加折衷一本大公至正可爲法則此次改編綱目自當
倣照辦理又明史內於元時人地名對音譌舛譯字鄙俚尙沿舊
時陋習如圖作爲兔之類旣於字義無當而垂之史冊殊不雅馴

今遼金元史已命軍機大臣改正另刊明史乃本朝撰定之書豈可轉聽其譌謬見在改辦明紀綱目著將明史一併查改以昭傳信朕非於此等音譯字面有所偏袒蓋各國語音不同本難意存兼合卽如滿洲蒙古文譯爲漢文此音彼字兩不相涉乃見小無識之徒欲以音義之優劣強爲分別軒輊實不值一噓朕每見法司爰書有以犯名書作惡劣字者輒令改寫而前此書回部者每加大作猶亦令將犬旁刪去誠以此等無關褒貶而適形鄙陋寔無足取况當海寓同文之世又豈可不務爲公溥乎將此通諭知之所有原頒明史及綱目三編俟改正時並著查繳○戊辰阿桂額森特奏查第三條山巖將至平壩爲赤布寨有戰礮七座回環互守必須攻克此寨直下河干始無阻礙順溝下至瀕河則噶朗噶及噶爾丹寺俱攔截在內初七日派兵沿溝潛進分頭搶入將

得思古各寨占住由得思古寨進而西北有寨落數處初九日乘勢攻獲五福等亦從安吉山鞍進運下攻克取大寨二座因思赤布寨在山鞍盡處形勢甚陡今官兵既克得思古可以抄出其後因於初十日前後合攻將赤布寨卽行攻獲是日又將噶爾丹寺南面寨落三處及東西寨落並水碓一併攻得比至天明卽將其寺焚燒以絕奔布爾邪教查噶爾丹寺本金川著名地方而噶朗噶尤爲賊人最大聚落今官兵竭三日四夜之力將噶朗噶一帶寨落一百十餘處戰礮三十餘座寨房二千餘間盡行奪獲噶爾丹寺亦不攻自潰前至勒烏圖不過數里見在趕緊添擊木柵直至河沿卽與明亮基木斯丹當噶新營隔河相對其榮噶爾博第八九峰賊雖死力拒守然山上下皆可覓路進兵諭阿桂等此次攻克噶爾丹寺噶朗噶等礮寨將軍參贊調度有方領隊大臣奮

勉出力甚屬可嘉俟卽日攻得勒烏圍後一併優敘至在事之將
佐弁兵並著阿桂等查明各部分別議敘○壬申 上啓癸秋獮
木蘭奉 皇太后駐蹕湯山行宮○免經過地方本年額賦十分
之三○明亮奏本月初七日由基木斯丹當噶進西山殺進攻巴
舍什下埽曲碩木一帶碉寨同時奎林督兵將大戰碉兩處攻克
和隆武所攻碉寨賊人衝圍逃逸兩路官兵會同珠爾格德直下
溝底殲賊甚多今阿桂等已將噶爾丹寺及左右寨落勒洗則茹
寨對河亦已肅清見因雨阻少晴卽整兵速進諭軍機大臣等明
亮等奏由巴舍什分路進攻奪取賊碉所辦尙好賊人當窮蹙之
時仍敢夤夜潛出連擾營卡此時功速垂成諸宜倍加謹慎勿稍
疏懈至所稱派都司眾神保在對岸趕築礮臺晝夜轟摧並派屯
士兵用烏槍擊打籌辦甚是前會計及官兵攻打勒烏圍時諭令

明亮於隔河用槍礮截擊以斷賊人歸路今明亮等所奏情形與朕前旨恰合惟當努力妥爲之至平定金川以後一切善後事宜亦需經費今諭戶部再撥庫帑五百萬兩此事辦成實屬一勞永逸雖多費亦所不靳○乙亥阿桂豐昇額奏十四日分兵兩隊派總兵成德遊擊普吉保等分路進攻潛抵丫口將石碣八座木城四座悉行攻克查遜克爾宗在榮噶爾博山陽第七峰後隨派曹順領土兵循山陽而下與豐昇額兵合力併進賊眾由牆後竄逸遂將石寨六處石碣十二座平房七處亦皆克取臣等復督兵將第三條山巖上之柵盡行架起並將伍岱等勒吉爾博之兵撤至第三條山巖換出臣海蘭察額森特之兵併力進攻至榮噶爾博之第八九峰地勢更險臣等公商若從半山擊柵踰溝而進用礮攻摧卽可斜上八九峰攻搶巴占從此前抵勒烏圍可無阻礙見

在應用木植砍伐運往以備應用諭遜克爾宗一帶我兵攻取年餘尙未得手若不將此處攻克後路究未埽淨今豐昇額全行奪取實爲奮勉出眾豐昇額乃巴圖魯額亦都之孫其果毅公爵卽係額亦都傳襲前將軍兆惠因平定準噶爾回部曾於公爵上加封四字今豐昇額能繼其祖著於果毅字下再加繼勇二字以示優獎

六月戊寅 上駐蹕避暑山莊○辛巳明亮奏查有額爾替一山上與基木斯丹當噶相連下界平坡賊據山頂前立石城周圍木柵外挖濠溝旁有戰礮擁衛後安大石卡戰礮各一座爲聚守計臣等派德赫布等由右手壓梁以防曲碩木賊人救援之路舒景安等由左手壓梁以防克爾瑪斯底葉安賊人救援之路和隆武等攻其前奎林等攻其後於十九日黎明前進和隆武領兵搶近

石城賊眾槍石如雨遊擊范宜申陣亡我兵力攻愈急奪取兩礮
賊番全行殺斃至奎林所攻石卡戰礮因賊援愈多竄入礮內死
拒攻至未刻令官兵撤回所得地方趕建木城派兵駐守見用大
礮轟摧未得礮卡侯少有殘毀即乘勢搶奪由此下拏木柵十五
六座穿過平坡擣其腹心無難立破諭軍機大臣等明亮等進攻
額爾替山梁搶奪石城礮座並痛殲賊眾雖未即行攻克亦足以
壯官軍聲勢而破賊人之膽此次和隆武所領之眾尤爲出力明
亮當查明記檔俟攻得勒烏圍一併交部議敘至遊擊范宜申身
冒槍石踴躍直前以致陣亡甚爲可憫著查其有無子嗣另行加
恩見今大功告成在邇凱旋後當照平定準部回部之例於紫光
閣圖畫功臣像並繪戰圖以垂示永久番地山川險隘之處未能
悉其形勢難於著筆著傳諭阿桂將節次打仗攻獲之賊寨如近

時攻得之遜克爾宗及前次攻得之谷噶喇穆喇穆色溯普康薩爾木思工噶克等及明亮一路之達爾圖至茹寨一帶凡有經將士等實在出力奮勇剿殺而得者查明各畫一圖並將帶兵大臣及勇銳將領於圖內註明附便進呈俟朕閱定○癸未 上詣廣仁嶺下萬壽亭恭迎 皇太后安輿駐蹕避暑山莊○己丑諭軍機大臣等阿桂等奏連次攻打巴占碉寨尙未能克賊人日就窮蹙竭力自護冀緩須臾之死勢所必然亦斷不能久拒而我官兵乘勝深入埽穴擒渠無難立待又稱河西沙爾尼一帶碉寨若明亮處移往礮位自上下轟並令伍岱在赤布寨以前趕擊木柵運大礮隔河夾擊賊必不能存站此計甚善朕前此展閱阿桂進到地圖曾指沿河一帶似可進兵隨傳諭商酌辦理今阿桂於未奉朕旨以前所籌適與朕意相合自可望其有成又據明亮等奏攻

克額爾哲碩塞見擬於平坡之下起立木柵辦理亦好明亮所稱平坡之下似卽沙爾尼一帶若能如阿桂所籌隔河夾攻自爲得力明亮等卽妥速爲之○庚寅予故恆親王弘晳祭葬諡曰恪○壬辰諭前因巴里坤烏嚕木齊等處大臣作爲額缺其所兼之銜俱令出缺另補見在伊犁將軍亦作爲額缺亦應將所兼之銜出缺另行補放伊勒圖所兼鑲黃旗領侍衛內大臣員缺著豐訥亨補授兵部尙書員缺著豐昇額補授伊勒圖於眾外藩處行文時久經書寫領侍衛內大臣兵部尙書官銜著仍照舊書寫○壬寅移雲南永順鎮駐騰越騰越協駐龍陵楚姚協駐永昌龍陵營駐楚雄○甲辰禁廣西商民出口貿易

臣王先謙敬編

臣周潤蕃恭校

秋七月庚戌諭據阿桂等奏訊據脫出之劉均祥供稱係甘肅兵前往四川軍營充當德爾森保親隨在木果木後山防守賊眾前來衝突德爾森保被圍尙射賊五六名又有一賊拉伊馬尾德爾森保僅餘一矢仍將此賊射死後被賊槍傷咽喉旋即墜馬被賊眾砍死經伊親見等語前因德爾森保係特派駐防木果木後山之人所守山梁被賊奪去以致將軍大營潰亂情罪重大且賊人衝突之時究不知伊作何下落恐係被賊擒獲是以將伊子俱擎交刑部監禁今覽劉均祥供詞德爾森保於潰亂之際打仗陣亡屬實德爾森保如果失陷緊要地方又不奮勇打仗縱捐軀亦不

足蔽辜卽將伊子一併治罪亦屬當然今伊打仗陣亡屬實其罪止於失陷地方不過停其議卹尙不至將伊子一併治罪著加恩將刑部監禁德爾森保之子卽行釋放伊等旣屬無罪之人所有應當差使著交該旗大臣照閒散滿洲例一體挑取行走朕辦理庶務一秉大公功罪皆由人自取如德爾森保前此失陷地方情罪重大身死又不分明卽將伊子監禁今旣陣亡屬實不至將伊子一併治罪卽施恩寬免毫無偏倚將此交將軍阿桂通行曉諭軍營官員兵丁外並著通諭八旗知之○丁巳諭軍機大臣等阿桂奏見於菑則大海山梁之西探有昆色爾及章噶兩處若能直占其地可繞出勒烏圍之南以斷噶拉依往來之路所籌甚好海蘭察已統兵前往進剿自可迅望得手又據奏軍營馬匹自將軍參贊領隊大臣而下各有自備之馬約計追擒賊首賊目時可得

二百餘匹無虞臨時拮据所辦甚是明亮處昨歲卽經阿桂知會
自必遵照辦理舒常一路亦然至富德南路情形大略相同自應
照阿桂處章程一體妥辦阿桂籌辦軍營大小諸務實爲盡心今
時當盛暑統眾攻堅賢勞足念因御製詩六韻親書筆頭賜之以
示嘉獎詩曰掌握師行掄俊豪事無巨細一心操功成九仞尤應
慎志洽諸軍實所褒探路欲因乘怠隙攻碣直可壓危堦我居避
暑原無暑卿效賢勞真是勞嘉予七言錫書扇凱歌三捷換征袍
勉之指日親郊勞紫閣銘勳崇爵叨○戊午予金川陣亡副都統
佛倫泰副都統科瑪入祀昭忠祠○己未明亮舒常奏石真噶爲
守護沙爾尼要口礮卡嚴密官兵每當前進少有聲息賊卽槍石
如雨因思向來運礮人聲喧雜賊習慣而不設備適新鑄大礮成
飭令星夜運赴石真噶乘運礮聲響之際分兵前進連克礮卡遂

進據該處石包雖山駭賊礮聯絡亦不憂下壓之難是沙爾尼一帶賊已無險可恃諭軍機大臣等明亮等自攻額爾哲以來久未能進甚爲廬念今乘運礮人聲喧雜之時派兵分路潛進奮勇直入連占大礮追殲賊眾自足令賊人喪膽且官軍連據石眞噶石包其下山駭賊礮無難攻壓而得卽沙爾尼一帶之賊亦俱可趁勢埽除其距勒烏圍雖隔一河而爲地甚近自可卽與阿桂等合力奮勦看來賊勢日益窮蹙今降番男婦各路紛紛投出賊中乏食慌亂情形大槩可知惟在各路將軍等設法上緊妥辦迅奏膚功共膺懋賞○壬戌諭軍機大臣等阿桂等奏從舍圖枉卡繞截圍攻將昆色爾山梁奪據並將果克多山峰戰礮攻克旋進克拉枯喇嘛寺及苗則大海各礮此次官兵等繞道奮攻奪礮殲賊實屬勇銳可嘉所有將軍參贊等統俟攻克勒烏圍時一併從優議

敘其打仗出力之將領弁兵等著阿桂查明咨部議敘額爾特出力尤多功罪足以相抵著賞給三等侍衛令其益加威奮以勵後效至攻奪碉卡將士踴躍倍常其中多有勇銳出眾之人著阿桂查明如係未得巴圖魯號者卽奏請賞給其已得者奏明量加賞賚俾將士倍知鼓舞速成大功又閱進到地圖已經攻克者頗爲不少若能將章噶速行攻獲卽可截出勒烏圍以南固屬甚善或賊人守拒尙堅未免略需時日閱圖內新得之魯克塔爾地方可通勒烏圍大路若從魯克塔爾山溝而出至托古魯對面過河由布勒一帶至勒烏圍可順壓而下似屬直捷今用硃筆點出著發交阿桂令其悉心酌辦○癸亥諭軍機大臣等明亮奏由石真噶分路下壓連克碉卡木城並攻獲噶西喇嘛寺將士等奮勇直進均屬可嘉而和隆武尤爲超眾國家又得一出力好大臣爲之喜

慰明亮等見在乘勝下壓自可迅勦沙爾尼一帶進搗賊巢佇盼捷音又據奏金川頭人阿布僧格太攜眷來投隨營打仗實出至誠其所屬之霍爾甲阿咱拉俱經賞給藍翎此人竟應賞給二等侍衛以示嘉獎俾其益生感奮番人男婦各路投出者紛紛而頭人來降則自此人始今加恩授職並賞花翎賊眾聞知或應相率來降未嘗不可以此爲招徠之計前次傳諭以頭人如有出降者俱當解京治罪原指大頭人如丹巴沃咱爾等黨助惡逆者而言若如阿布僧格太輩果能竭誠投降原可恕其已往若再能出力並當逾格施恩且不獨此時爲然卽攻克勒烏圖以後有頭人望風來降者尙可一體收用若大兵已抵噶拉依賊眾窘迫之時始行投降則非此時可比止應暫留營中解京辦理○甲子停止內地查禁鳥槍○丁卯阿桂豐昇額海蘭察額森特奏攻克章噶等

處礪寨殲賊甚多又額洛木寨頭人革什甲水參喇嘛科爾頭人
雍中什爾德寨頭人丹比西拉布等三人率領戶眾來降均稱金
川地方乏食伊等口糧尙不至乏絕實出誠心納款卽將該番眾
發往附近內地土司安插其尙可用者將伊眷屬遷移向內留該
番隨營勦賊諭軍機大臣等此時章噶旣得已拊勒烏圍之背或
先截斷勒烏圍通噶拉依之路或自上下壓直擣勒烏圍均可計
日而待設或賊眾自揣力不能支逃回噶拉依卽未能多殲賊眾
而業已埽去一穴自益見窘感看來賊眾卽或聚守一隅而敗回
之賊愈多口食愈形竭蹶其勢斷難久拒但恐賊人外竄未免又
稽時日不可不多方設法廣爲攔截又據奏頭人等率領戶眾來
降其慌亂情形大槩可見自是極好機會至該頭人三名誠心納
款尙非窘急求免情較可原如果認真出力應賞以藍翎頂帶俾

倍加感奮報效且使番眾聞知益堅其投出之心賊勢更易於潰散阿桂等卽當妥酌而行○戊辰諭三阿哥之格格指與丹巴多爾濟爲婚完姻在邇恐伊等念朕之孫女於一切典禮俱按公主一體舉行亦未可定朕之孫女較之公主又隔一輩自不應按照公主仍行主僕之禮卽如扎拉豐阿所尙係皇祖之孫女伊於姑前如何行禮之處三阿哥之格格自應倣照而行如果能按家禮克盡婦道朕方爲之欣悅儻必欲固執以爲朕之孫女應照公主禮相待反與朕之施恩指婚本意不合再羅布藏多爾濟之子旺沁班巴爾曾將五阿哥之格格指與爲婚俟完姻時亦應一體遵行嗣後朕之孫女指婚後俱照宗室格格禮行毋違朕諭○己巳諭軍機大臣等明亮等奏由石真噶下壓攻克沙爾尼溝達思拉木一帶碉卡所辦甚好至新降頭人阿布僧格太此次招降頭

人絨布僧格並策旺寨內眾番頗屬誠心效力著明亮酌賞段匹傳旨嘉獎以示鼓勵章京孟德用槍擊仆策旺甚屬得用又奎林等派令圍裹木城之都司沙津岱及敖成進攻碾占時帶兵從碾後抄截進剿賊眾之遊擊銜馬應詔守備孟洪翼均各奮勉並著明亮確查各該員等此次勞績及平日勇幹勤勉若何奏明請旨

○庚午諭軍機大臣等阿桂奏將直古腦榮噶爾博一帶碉寨及冷角寺等處悉行攻克已直壓勒烏圍之上見派兵圍其兩面勢若建瓴自可唾手而得惟據雍中爾甲木燦供稱老土婦阿倉及僧格桑之妻得什爾章用皮船過河而去莎羅奔等隨後亦從各路逃竄等語賊酋賊婦諒不過逃回噶拉依計官軍堵穴擒渠自斷不能漏網惜此時未能卽行擒獲耳又閱圖內甲爾日磔橋一處在勒烏圍西南通噶拉依要路若能先將此處攻得斷賊往來

之路賊眾自無可逃阿桂見尙未能得必須設法先行攻占則勒烏圍之賊更難自存勦之尤易得力朕於圖內用硃筆標記發交阿桂速爲籌辦同日明亮等奏見在已攻扎烏古山梁隨將丹扎木寨落焚燒等語明亮若能攻得扎烏古即可與阿桂併攻勒烏圍更爲得勢佇盼捷音○癸酉重刊金史成 御製序曰遼金元三史人地名音譯譌舛鄙陋失實者多因命儒臣按同文韻統例槩行更錄蓋正其字弗易其文以史者所以傳信示公不可以意改也茲閱所進金史見其中文法乃多有未當者如稱元兵爲大兵大軍以元臣修金史理固宜然而於大兵大軍等句下或接稱上或稱朝廷則又皆敘金朝事略無界限分別使淺學者觀之幾不能辨其爲何代語是乃文義不佳之故然此猶小疵非若人地名之謬誤宜改仍其舊可也至若崔立傳贊云其志方且要求劉

豫之事我大朝豈肯效尤金人者乎金俘人之主帝人之臣百年之後迷啓崔立之狂謀以成青城之烈禍云云直是痛加詆斥實爲非體夫一代之史期於傳信若逞弄筆鋒輕貶勝國則千秋萬世之史皆不足信是則有關於世道人心者甚大推之明修元史類此者應復不少然史書流傳已久難以釐正亦不得不仍其舊若我本朝修明史於當時賢奸善惡皆據事直書卽各篇論贊亦皆覈實立言不輕爲軒輊誠以作史乃千秋萬世之定論而非一人一時之私言予向命纂通鑑輯覽於明神宗以後仍大書明代紀年而於本朝定鼎燕京之初尙存福王年號此實大公至正可以垂示天下後世豈若元托克托等之承修金史妄毀金朝者之狃於私智小見所可同日語哉書此以揭重刊金史之首抑亦有慨於前而所以深誠於後也○是月直隸總督周元理奏見在紅

旗將到軍報緊要渾沱河山水陡發舟莫能渡辦有皮袋水帶等物令習水者束皮袋於肩繫水帶於兩腋下外添習水者四五人於波浪中夾護而渡雖不無稍遲而涓滴不漏得旨嘉獎

八月丙子朔日有食之○丁丑諭軍機大臣等阿桂等奏攻克隆斯得賊寨係賊藏貯鉛藥之所見獲其火藥一百餘簍其槍子堆貯屋內自數寸至二尺餘深此必係賊人前歲在木果木劫取者今經官兵收得實爲快意此寨一得賊人鉛藥無資自更難於守拒官兵攻勦尤當迅捷至明亮處攻奪扎烏古山梁派委之屯土兵丁及引路之降番阿布僧格太霍爾甲阿咱拉等甚爲出力自應予以獎勵著明亮卽傳旨將阿布僧格太霍爾甲阿咱拉三員酌賞段匹其屯土勇銳兵丁著各賞一月錢糧俾伊等益知鼓舞至於番地路徑土兵固所熟悉然用爲嚮導則可若攻堅越險則

索倫吉林兵丁皆所優爲卽綠營中亦有可供驅策者遇攻打礮
寨之事自應將滿漢兵丁與屯土各兵一體選派業已節次傳諭
何以明亮此次進攻乃專選屯土兵四百名獨當一面並不派令
索倫吉林及綠營精銳兵丁合力前往殊屬非是又明亮摺內稱
後隊官兵進攻礮少存畏難之見則在內屯土兵丁竟無一人得
脫等語是明亮未嘗不知此地之危險而令降番土兵前往嘗試
儻使若輩窺破必私相抱怨謂將軍不惜伊等身命令其前驅冒
險豈肯復安心出力且同係番人其爲賊死守抗拒者實堪切齒
必當殲戮無遺若旣已投誠卽與內地之人無異自當一視同仁
至屯土兵眾均係效力隨征尤不應稍存歧視將軍等若專於滿
漢兵丁優加體恤而於降番土練視爲無足重輕不稍顧惜如此
卽爲不公此事甚有關繫著傳諭阿桂等一體遵辦○壬午河南

武陟縣水災賞修房銀兩一月口糧並給籽種○甲申阿桂豐昇
額海蘭察額森特奏官兵連夜攻勒烏圍轉經樓附近寨落搶占
賊寨其地有高礮五層須逐層攻克見已至第四層礮下○丙戌
以汪圻爲雲南按察使由山東糧道遷○己丑明亮奏琅谷上連扎烏古
臣派兵進擊礮內賊人槍石如雨適降番阿布僧格太喊諭守卡
之賊賊人奔潰遂克琅谷諭軍機大臣等明亮之兵若能從扎烏
古下至河沿卽與勒烏圍緊對於隔河用礮轟擊賊眾自難久支
亦足爲阿桂之助阿桂此時如已攻得勒烏圍自屬甚善否則帶
兵速往河西北岸將沿河一帶礮寨盡行攻克卽在隔河攻打勒
烏圍可不虞賊人隔岸槍礮阻攔卽扎烏古賊眾亦難占據並可
引明亮之兵下至河岸合力進攻實爲兩便阿桂等當卽安速爲
之至明亮攻打琅谷賊寨時降番阿布僧格太喊諭守礮卡之賊

甚爲出力著明亮卽傳旨賞給段二匹以示獎勵○辛卯 上自

避暑山莊巡幸木蘭行圍○諭滇省辦理逃兵王天惠一案將應

行立即正法之犯援照自首舊例枷責發落錯謬已極然圖思德

之咎止於革任註冊至審辦此案係署臬司王太岳專責乃竟妄

爲援引舛謬若此其罪難以輕追王太岳人本平常且由翰林簡

用道員復洊擢至藩臬從未見其實心妥辦一事在任一味模稜

今於此等逃兵猶欲意存寬縱取巧沽名實屬有負任使王太岳

著革任發往軍臺效力贖罪以爲大員旅進旅退者戒○壬辰以

朱椿爲雲南布政使由廣西按察使遷○癸巳調廣德爲廣西按察使以

蔣允焄爲福建按察使由汀漳龍道遷○甲午諭軍機大臣等阿桂等奏

連夜分攻各碉寨沿河接拏木柵已與勒烏圍東西平對如此兩

面合圍賊眾斷難支禦諒可立時攻克乃賊人猶復悉眾死守固

東 卷八十二

屬護巢力拒亦由其罪孽深重必待盡殲而後已至旣得勒烏圖則轉經樓之賊自難存住卽甲爾日磔橋亦當自潰其科布曲賊寨據脫出番人供稱莎羅奔弟兄三人見俱在彼自卽應乘勝攻克悉行擒獲從此進攻更不慮後路有賊滋擾至於索諾木見住甲雜阿桂進攻時自當分兵兩路一由雍中喇嘛寺攻打噶拉依擣其巢穴一派兵徑赴甲雜官寨擒其逆酋方爲妥協○己亥諭據定西將軍阿桂等馳奏紅旗報捷於八月十六日已攻得勒烏圍賊巢此實仰賴 上天眷佑成功迅速而將軍參贊實心宣力調度得宜將領弁兵各奮勇集事均屬可嘉所有將軍阿桂副將軍豐昇額參贊大臣海蘭察額森特及在事將弁等著交部從優議敘其出力之滿漢官兵屯土兵練俱各賞給一月錢糧以示獎勵又諭將軍阿桂等奏報攻克勒烏圍賊巢紅旗於八月十六日

自軍營馳發今於八月二十四日丑時遞到木蘭行在計沿途僅行七日實爲迅速所有辦理臺站驛遞文武官員均屬可嘉著該部查明同兵部捷報章京一併議敘各站差弁兵夫並著該部查明照例議賞其馳送紅旗到行在之各站員等同捷報章京等著行在兵部查明先行賞給段匹兵部員外郎額爾克圖自辦理軍務以來承辦捷報頗屬勤勉見係該員齎遞紅旗著賞戴花翎並交該部遇有郎中缺出卽行升補○諭軍機大臣等官兵攻克勒烏圍已降旨將將軍等從優議敘並遣阿彌達齎紅寶石帽頂至軍營賞給阿桂以示優眷俾益奮迅集勦此次攻取勒烏圍官軍聲勢益盛扎烏古山梁等處僅一河之隔賊人隔岸望見其勢自難復支理應不攻而潰計明亮聞阿桂捷音自應統兵直進迅掃賊人寨落以期兩軍會合何以未見明亮奏到或其所發之摺不

及阿桂捷報八百里馳遞之速著諭詢明亮將近日勦賊情形若何迅速具奏○甲辰封禁湖南湘鄉等二縣礦礦○乙巳阿桂豐昇額海蘭察額森特奏八月十六日攻克勒烏圖賊巢及轉經樓喇嘛寺並未獲碉房寨落木城石卡六十餘座殺賊數百人奪獲槍礮刀矛無算得旨此皆由上天垂佑爾等同心宣力方能成此大勦嘉悅之外幾欲垂淚更當合力前進速成大功以俟厚獎九月丁未定難廕漢員發標學習例○己酉諭布政使郝碩自赴西路督辦糧儲實心催趨經理從無貽誤按察使銜建昌道白瀛承辦軍需歷經四載自收復小金川及進攻金川一切不辭勞瘁均屬奮勉出力郝碩白瀛著加恩各賞戴花翎再劉秉恬前此獲罪原係總督任內之事伊自革職後駐紮楸砥總理糧運兩載以來尙能留心經理妥協盡力並著加恩賞給兵部郎中仍賞戴花

翎劉秉恬務宜益加奮勉以副朕格外加恩至意○諭軍機大臣等阿桂等奏通籌直搗噶拉依賊巢一摺該處進兵路徑阿桂屢探已久自係成竹在胸實有把握方如此籌辦且自十七晚官兵已陸續起程至空色爾而海蘭察同各領隊見俱奮迅進攻可望得手自應聽其照所擬妥速勦辦阿桂見既併力直搗賊巢自不能復有多兵派幫明亮且阿桂如卽能攻得噶拉依則其餘各處碉卡賊眾斷難再拒必皆自行潰解況阿桂節次所籌俱有成效今大功已屆垂成更惟阿桂是恃一切悉聽其調度第阿桂等統兵進攻以後恐扎烏古等處賊人潛至勒烏圍撓我兵後路其事甚有關繫阿桂見派額森特在轉經樓前科布曲山巖之下駐紮攻打以牽賊勢額森特雖尙未能上馬遠涉而防守是其所長著阿桂卽札知該參贊令其在勒烏圍一帶小心看守勿使隔岸之

賊得乘隙過河滋擾或至稍有疏虞○辛亥諭軍機大臣等據明亮奏調兵由碾占下壓並與西路約期會剿自應如此辦理因展閱阿桂處前此進到地圖內有碾占之名就其形勢而論若果能從彼下壓則扎烏古阿爾古一帶賊人皆攔截在內自可不攻而潰況與阿桂訂期進攻彼此爲犄角之勢更可互相照應著傳諭明亮總須相度機宜妥速辦理若已攻至沿河而阿桂一路之兵亦已繞出又可夾攻科布曲賊礪以期必克明亮仍當統兵前赴甲雜擒捕逆渠務須必獲明亮之立功卽在於此當努力妥爲之○癸丑 上駐蹕避暑山莊○乙卯諭軍機大臣等據李侍堯等奏船商陳萬勝帶投暹羅國鄭昭文稟一件稱平定打馬部落人眾投歸內有滇省兵趙成章等十九名附商船送回並情願合擊緬匪乞賞礮鐵礮位等因一摺該督等以訊據各兵係上年八月

內緬匪攻破打馬隨奔至暹羅等語與鄭昭來文云因青靄爲其所平打馬部落率眾來降之語其情詞不無粉飾但見將內地兵丁搭船送回尙小心恭順其所請礮鐵等項李侍堯以礮位不便准給其礮礮鐵鍋等物查照上年請買數目准行之處所奏甚是自應如此辦理至所云緬匪於鄰疆諸國多遭殘害自必志切同仇果能糾約合舉直抵阿瓦擒其渠魁上爲天朝立功下爲爾主雪恥大皇帝鑒爾忠貞必有非常曠典等語立言殊不得體中國當此全盛之時如果欲征勦緬甸何必借助於海外小邦况撫馭外夷亦自有道若藉其力翦滅叛蠻彼必恃功而驕久且效尤滋甚更難駕馭此乃一定之理李侍堯等蓋未見及此也見令軍機大臣代擬檄棄發去再閱奏摺內稱賞礮鐵礮位並稱礮位礙難准行之語及閱鈔錄鄭昭原稟係乞礮鐵銃仔所云銃仔似卽內

地之礮子而非礮位是否鈔稟舛謬抑係敘摺偶誤並著查明具
奏見在所擬檄稟卽照銃仔立言並著李侍堯查對原文再行繕
寫發往諭以本閩部堂接閱來稟並開列名單送回滇省兵丁十
九名具見小心恭順所請礮鐵銃仔前經駁飭今除銃仔一項關
繫軍器定例不准出洋未便給發外其需用礮礮鐵鍋准照上年
請買之數聽爾買回以示獎勵至所稱若以緬匪兇頑罪在不赦
欲加天討昭願率兵合擊但昭統攝初安軍需缺乏冒乞恩錫礮
鐵銃仔並懇據實呈奏等語所言已悉但天朝統馭寰宇中外一
家國富兵強勢當全盛前此平定準噶爾回部西北拓地二萬餘
里今因兩金川狼狽爲奸負恩抗拒官兵征剿見已擣其巢穴大
功指日告成獻俘行賞西南諸番部亦可永慶安全德威所布遐
邇莫不震懾至緬匪頑蠢負隅甘棄生成之外實爲覆載所不容

亦屬貫盈所自取邇來因申討金川遂將滇兵暫撤今策勳在邇
或閱一二年稍息士卒之力再行厚集兵力將緬匪一舉蕩平此
時自難豫定若果欲埽除緬匪則以百戰百勝之王師奮勇直前
所向無敵視攻擣阿瓦不啻摧枯拉朽何藉爾海外彈丸聚兵合
擊或爾欲報故主之仇糾約青羅紅沙諸鄰境悉力陳兵盡除花
肚亦聽爾自爲之設或爾志得伸據實稟報本關部堂覆覈無異
自當代爲奏聞大皇帝爲天下共主亦必鑒爾忠誠予之嘉獎至
於中國之欲平緬匪與否聖主自有權衡固非我守土之臣所敢
料亦非爾之所當請問也將此詳悉檄諭卽由六百里傳諭李侍
堯知之○丙辰諭軍機大臣等阿桂等奏官兵攻得勒烏圍移營
高處河水陡漲數丈若漲在數日以前則沿灘木柵必致被衝等
語實仰賴 上蒼嘉佑惟當額手敬謝卽此 天心助順可徵成

功之速○丁巳 上恭送 皇太后回鑾○辛酉 上自避暑山莊回鑾○壬戌阿桂豐昇額海蘭察額森特奏前擬從達思里噶拉字進兵今因陰雨阻滯達思里一帶賊俱增修礮卡恐未免多煩兵力復躡探得什爾德山梁之南過溝爲達烏達圍再上爲安布魯木順梁而下卽至聶烏過勒烏溝而上正對則朗噶克了口一經攻占卽已截科布曲賊人之後而噶拉依更爲震動諭軍機大臣等阿桂等奏覓路繞截進攻情形所籌甚好且據稱初四午後天氣漸晴擬於今日發兵務期迅速占據等語今節令已當九月向後自應晴爽阿桂等繞道進攻必能有益佇聽捷音再阿桂昨曾與明亮相約令其俟河東進攻達思里時卽從礮占下壓今阿桂擬從達烏達圍一帶進攻又在達思之北似不與礮占相對或阿桂處另行通知明亮相訂會辦亦未可定軍營之事移步

換形難以遁爲揣度阿桂長於謀計於籌畫軍務機宜尤所諳悉
明亮等惟當聽其妥酌行之○丙寅諭軍機大臣等據明亮奏碾
占巴扎木兩路賊人拒守甚嚴未能卽進擬親赴西路與阿桂併
力以圖又據舒常奏奉諭旨令赴絨布寨更替富德見由沙爾尼
起程前往等因均屬大謬看來明亮竟係因北路見無可進之機
而阿桂一路自攻得勒烏圍以來統兵前進聲勢甚盛遂欲捨此
就彼甚屬非是各路分派將軍參贊責有專司自應各就本路調
度熟籌以期集事卽彼此有應關照之處亦不過聲息時通訂期
夾擊互相犄角斷無舍己從人之理況西路有阿桂爲將軍又有
豐昇額爲副將軍尙何藉明亮之相助卽欲添阿桂兵力亦止須
令奎林和隆武統領前往明亮何得輕率親行且三將軍俱聚於
西路而北路竟無一總統之人亦無此理明亮旣欲親行又不留

舒常在營駐守實爲非策至所稱阿桂寄來摺彙西路可供打仗者止一萬二千人僅敷什爾德一帶進攻欲令帶兵數千爲續添力量合勢埽巢等語若其事果出阿桂之意則阿桂亦有不合因檢閱阿桂原摺據稱西路兵雖共三萬二千因自梭洛格古一帶道路綏長近於後路營卡內極力抽兵止得一萬二千僅敷什爾德一帶分路進攻及爲接續之用等語此就見在抽兵情形而言並非議令相助又據稱明亮前至軍營面商告以俟官兵繞進得手之後或河西另有機會再行籌辦過河幫助否則俟西路攻進噶拉依時明亮帶兵數千前來爲添力合勢埽巢之舉等語此乃指攻圍噶拉依將得之時而言其時明亮或果由碾占一路乘機攻得方令前往並非令其捨河西一帶不顧徑往相幫蓋明亮誤看阿桂摺彙並將上下文意錯綜誤會遂至於此因復細閱明亮

之摺據稱屆時統兵親往似此時尙未起身果爾則北路兵尙不
至於遽渙但恐舒常旣行明亮又冒昧卽往賊人窺見此路無人
潛從扎烏古而下將沙爾尼茹寨等處復行占去則於全局大有
關繫甚爲可慮總之此事明亮舒常所辦太覺謬戾非尋常錯誤
可比著傳旨嚴行申飭明亮此時斷不可輕離北路如或阿桂果
有必須助剿之處卽令奎林和隆武帶兵數千前往亦無不可明
亮若能卽將河西一帶及早攻奪下至沿河方可與阿桂關照會
剿否則將河西一帶加意嚴緊守禦勿爲賊人窺伺滋擾聞進到
之圖所有扎烏古山梁未克賊碉尙在勒烏圍東北明亮並未將
沿河一帶料理肅清斷其過河至勒烏圍之路萬一賊人由彼偷
越於勒烏圍甚有關礙不可不極力嚴防阿桂曾派令額森特在
勒烏圍轉經樓甲爾日碌橋一帶駐守此皆防西來之賊非防北

來過河之賊此處大有關係仍當諭令實力留心處處照料不可稍有疏忽明亮後路未清之時阿桂切不可將額森特調令他往致滋貽誤阿桂並傳諭額森特知之至沙爾尼茹寨一帶爲軍糧軍火臺站所經不可無妥幹大員坐辦富勒渾昨奏往底木達經理糧臺原爲功噶爾拉當噶爾拉一路進兵因思該處進兵不過牽綴無庸富勒渾往彼相助就見在情形而論河西所關尤重富勒渾自當在此一帶留心妥辦或仍在校洛柏古或酌籌與明亮軍營相近最要之處駐守至功噶爾拉當噶爾拉進與不進無關大要阿桂攻得噶拉依時如欲添兵或調長青處兵一千名令其帶往幫攻甲雜蓋噶拉依一經攻得則功噶爾拉當噶爾拉皆成內地長青自可徑行無阻著阿桂妥酌行之至於河西碾占一路雖賊人堅拒難進自應別探可進之途卽如阿桂處初擬由達恩

里一帶進攻繼聞賊人知覺豫防卽改由達烏達圍經安布魯木而進程雖稍遠而攻其無備自易得手若如明亮之畏難輒止何由所向克捷耶又聞明亮圖內官兵所設營卡太多上下列布三層似覺無謂今旣將達布依一帶營盤拆毀前移何不將石真噶一帶及達思拉木方營向北一帶小營盤移撤又可抽添無數兵力明亮何不計及於此嗣後務宜諸事留心爲安舒常較明亮稍有心計是以前此派令往吉地駐辦堵截逆酋之事旋經明亮奏其於北路軍務番情熟習仍欲得其相助是以卽令復回北路而令桂林往代至於襲擊正地一事原令舒常同阿桂酌量辦妥卽回北路嗣因阿桂奏請令舒常往緘布換富德至吉地堵截雖允所請隨據舒常奏已於八月二十八日自吉地起程徑赴明亮軍營朕尙以其徑去爲是是以諭令仍在北路無庸前往緘布更換

而以吉地堵截之事交桂林辦理朕於七八千里外籌度機宜止能如此軍營之事移步換形或接奉後旨與前旨情形不符果能揣度事勢擇其妥是者奏聞而行朕非惟不責其故違並且獎其曉事舒常豈尙不知而拘泥若此耶舒常奏已於初十日起身若至正地料理襲擊之事稍就卽接奉前旨仍回北路自屬最要若已馳赴絨布而富德又自絨布前往吉地彼此甫經更調又止宜各就見駐之處作爲定局實力妥辦不可因有此旨復行僕僕道途徒勞跋涉舒常富德均當妥酌而行○丁卯 上奉 皇太后回京師○戊辰諭明亮在軍營不甚奮勉成功後如何用伊之處另降諭旨所有廣州將軍員缺著永瑋補授○阿桂豐昇額海蘭察額森特奏達思里噶拉宇一帶因賊眾固守改道從達烏達圍繞進營攻海蘭察所帶之兵分爲七起豐昇額額森特處亦分三

路值風雨交作涉險衝泥克取富噶克底綽爾丹色木里各喇卡
並將原擬進攻之達思里噶拉字莫魯古各處喇卡寨落悉行攻
克諭軍機大臣等阿桂等原欲攻達思里等寨因賊人知覺豫防
須改從達烏達圍繞進今於繞進之時不但將改道擬攻之富噶
克底一路盡心攻克並將原擬進攻之達思里噶拉字莫魯古一
帶盡皆搶占將軍參贊調度有方在事之將領弁兵等皆冒雨衝
泥攀崖越險所向克捷甚屬可嘉所有阿桂豐昇額海蘭察額森
特及奮勇之領隊大臣等各分別賞給荷包以示獎勵仍俟攻克
噶拉依時一併交部優敘俾膺渥典至阿桂統兵攻勦噶拉依爲
搗其腹心之計深得窺要見在督兵進攻自斷不容復行抽撥往
助明亮是以前諭阿桂令調長青所統之兵但昔嶺一帶亦須有
人牽綴卽長青之兵似亦不宜調動著阿桂妥酌行之至勒烏圍

及甲爾日磔橋一帶甚爲緊要宜防扎烏古等處之賊過河滋擾所繫匪細前據阿桂奏派額森特在彼駐守頗爲可恃聞此次奏摺額森特業已帶兵進剿則勒烏圖一帶見派何人代彼在該處專防後路過河之賊其責甚重阿桂宜選派勇幹之人駐辦仍將派委緣由卽行奏聞○阿桂奏接奉諭旨令臣凱旋時帶綽斯甲布布拉克底沃克什明正瓦寺五土司來京查瓦寺土司故後伊應襲之子年幼尚未襲封布拉克底土司阿多本係跛足令人背負而行自不能遠赴京師至番人有生身熟身之分與蒙古無異未經出痘者心多畏懼請令明正沃克什等先來此後有願輸忱瞻覲者再行辦理報聞○壬申諭今歲係閏十月天氣漸就近寒所有五城煮賑著於十月十五日爲始○甲戌命再撥部庫三百萬兩豫備四川軍營善後事宜

冬十月乙亥朔諭高晉奏江安糧道員缺緊要請以新升廣東惠潮道陶易留江改補俾得熟諳之員接辦期於漕務有裨等語陶易著照所請調補江安糧道高晉奏留陶易與前日三寶奏留舒希忠相似而實不同朕惟準至理以爲權衡故准駁亦因之而異陶易在江年久舒希忠在浙年久雖相彷彿而一由知府升道一由同知升府其遷轉亦不甚懸殊但陶易歷任淮安江甯於各衛情形諳悉高晉欲留其接辦江安糧道以資駕輕就熟之益乃爲漕務擇人起見而陶易所得之廣東惠潮道亦係監司要缺該員自無所揀擇於其閒事屬可行是以允准若舒希忠雖由知縣至同知皆在浙江於該省民情亦自熟習但三寶留彼並非有必需該員辦理之事徒以其升任廣西柳州府欲爲留浙改用柳州府邊省惡缺人皆憚於遠涉舒希忠自不願前往三寶此奏乃爲人

擇缺起見恐此端一開凡籤升遠省者皆得藉上司奏留以遂其
趨避之計此風斷不可長是以不但准並加之飭諭朕辦理庶
務一秉至公可否惟視其人之自取實無絲毫成見於其間各督
撫如欲奏辦此等事件具摺時先當自問其爲公爲私即可豫揣
其應准應駁若各屬員妄懷僥倖之心上司略存邀譽之見非惟
無益而適以自害不可不慎也官員推升他省不許督撫奏留前
曾降旨飭禁恐行之日久人漸相忘而任封疆年淺者或並未知
此例若遽加懲治未免不戒視成是以三寶前奏僅予傳旨申飭
著再將此明白曉諭各督撫嗣後不得以不應奏留之人率行瀆
請如違定行交部議處必不輕宥○丙子調富察善爲盛京工部
侍郎由倉場侍郎調○調喀爾崇義爲盛京戶部侍郎穆精阿爲盛京刑
部侍郎由刑部侍郎調○丁丑以汪永錫爲內閣學士由詹事○庚辰阿桂

豐昇額海蘭察額森特奏攻克達思里山骹第二三礮並攻開礮
下寨落五處所克礮寨悉行燒毀此時達思里山骹上下礮寨已
清若下至溝邊將雅瑪朋寨落及科思果木往來路徑竟行占住
又可添一進取之路臣等見在督兵卽於所燒各寨落處拏柵而
下相機攻搶○乙酉申諭直省督撫仲冬奏報實在民數○孫廷
槐以不職降調以陸燿爲山東按察使由運河道遷○己丑賜王懋賞
等四十八人武進士及第出身有差○諭畿南一帶雨水稍多成
災之保定等四十七州縣應照例撫恤賑濟被災較重之霸州等
六州縣先於九十兩月摘出賑給加恩將應得大賑卽於閏十月
開放○庚寅諭嗣後巡察盛京黑龍江吉林三處及歸化城游牧
二處人員總歸都察院奏派並定五年巡察一次著爲令○壬辰
上至靜安莊視 令懿皇貴妃金棺奉移勝水峪○丙申諭前

據刑部奏鎮遠府知府蘇壻揭告該省督撫藩臬等串通一氣袒庇劣員席纘一案彼時卽疑蘇壻必係聞上司有將伊參奏之信故爲先發制人計圖反噬因違例由驛速遞但事關通省大員不可不徹底根究因派侍郎袁守侗阿揚阿前往查辦嗣據署督圖思德參奏蘇壻浮收稅銀勒索船戶客民及得受本地鄉紳餽送婪贓纍纍均有證據且稱委員於八月十五日抵鎮遠查訪蘇壻款蹟蘇壻卽於八月十九日用六百里馬遞通揭部科等語果不出朕所料蘇壻卑鄙狡詐目無法紀實出情理之外卽降旨將蘇壻革職交袁守侗等嚴審定議具奏至蘇壻在鎮遠府如此劣蹟昭著韋謙恆近在同省何竟漫無覺察直待署督入境風聞訪明列款參劾則韋謙恆平日所司何事乃僅以會銜附摺了事此後並未提及蘇壻一字實不解其何意因傳旨飭令明白回奏今韋

謙恆回奏之摺尙未奏到乃因蘇壻揭稱席纘任內臺役詐贓逼命及將屯軍酷刑杖斃二案有與伊牽涉之處曉曉剖辨而於蘇壻貪鄙之事仍不置一辭竟視蘇壻貪贓款案若與伊無涉者然其罪實無可追伊摺內自稱素性愚直不知其竟係優柔取巧此等伎倆豈能在朕前嘗試韋謙恆係朕特加擢用之人乃辦事乖謬若此殊屬負恩溺職不但不可護理巡撫並不可復爲藩司韋謙恆著革職發往軍臺效力贖罪其貴州巡撫員缺著裴宗錫調補雲南巡撫印務著圖思德暫行兼署安徽巡撫員缺著李質穎補授安徽布政使員缺著王顯緒補授安徽按察使員缺著農起調補山西按察使員缺著李承鄴補授貴州布政使員缺著鄭大進補授湖南按察使員缺著永慶補授其所有硃批韋謙恆原摺並著發鈔與眾閱看其摺內所辦二案亦著袁守侗等一併審明

具奏裴宗錫未到任之先貴州巡撫著袁守侗署理

永慶由巴里坤道員遷

○戊戌諭軍機大臣等阿桂等奏攻克達噶木山包賊礮見在設

法分攻雅瑪朋礮寨以便進攻科布曲所辦甚好達噶木爲賊緊

要咽喉今官兵旣已占據從此進攻自更得力又奏小金川頭人

末利阿什咱同妻舅阿噶爾甲投至軍營請暫緩辦以供軍營體

訪之用所見亦是末利阿什咱係小金川頭人黨助逆酋帶兵抗

拒與旣降復叛之阿噶爾甲情罪均無可追今阿桂旣欲暫留在

軍營供用或可稍資其力亦未可定設其人果欲立功自贖實有

可藉以誘惑賊眾之機卽酌量賞給頂帶使眾番豔羨亦無不可

統俟大功告成之後將該賊目解京另行辦理再西路之兵因阿

桂屢戰克捷遇敵皆踊躍直前而北路之兵因明亮經久未能寸

進眾心不免稍阻自當設法鼓舞使人知勵勇效用方爲有益明

進眾心不免稍阻自當設法鼓舞使人知勵勇效用方爲有益明

亮舒常各宜努力自奮

閏十月丁未賞旗兵閏月甲米著爲令○乙卯簡派宗室族長○辛酉諭軍機大臣等朕昨檢閱各省呈繳應毀書籍內有僧澹歸所著徧行堂集係韶州府知府高綱爲之製序兼爲募貲刊行因查澹歸名金堡明末進士曾任知縣復爲桂王朱由榔給事中當時稱爲五虎之一後乃託迹緇流藉以苟活其人本不足齒而所著詩文中多悖謬字句自應銷毀高綱身爲漢軍且係高其佩之子世受國恩乃見此等悖逆之書恬不爲怪匿不舉首轉爲製序募刻其心實不可問使其人尙在必當立寘重典因令查閱其家收存各種書籍今於高綱之子高秉家查有陳建所著皇明實紀一書語多悖謬其書板自必尙在粵東著傳諭李侍堯等卽速查明此書板片及所有刊印之本一併奏繳又查出喜逢春傳奇一

本亦有不法字句係江甯清笑生所撰曲本既經刊布外間必有流傳該督撫等從前未經辨及想因曲本蒐輯不到耳一併傳諭高晉薩載於江甯蘇州兩處查明所有刷印紙本及板片槧行呈繳高綱爲滄歸作序朕於無意中閱及可見天理難容自然敗露其子高秉收藏應毀之書卽或前此未經寓目近年來查辦遺書屢經降旨宣諭凡繳出者槧不究其已往今高秉仍然匿不呈繳自有應得之罪已交刑部審辦此專因高綱爲八旗大臣子孫其家藏有應毀之書不可不示懲儆至陳建在天啓間卽清笑生似亦明末時人其兩家卽有子孫均可不必深究設或民間尙有藏者但經獻出均可免罪將此由四百里一併諭令知之○壬戌諭本日御史王寬奏請將各省秋審經九卿改輕改重之案酌定處分一摺所奏甚屬非是朕辦庶獄一秉大公至正卽有更改惟在

準情酌理務得其平從不存絲毫成見至每年辦理各省秋審俱經細閱數次其中稍有一綫可原者臨時卽不予勾或各督撫有問擬失當經九卿改正者朕量其改駁案件少者傳旨申飭多者或交部察議其事亦祇可如是而止卽如今年四川省改駁多至五案亦止將署臬司顧光旭嚴加議處而署督文綬尙因其承辦軍情特予從輕此眾所共知者乃該御史欲請將秋審改多之案明定處分此必私心揣測妄以朕爲有意從嚴若果行其說其無知之督撫自皆避寬縱之名共思從重以免過勢必致失入者多於民命所關甚鉅國家設立刑章辟以止辟聞尙德綏刑未聞尙刑綏德王寬此奏斷不可行向來御史每遇給事中缺出時多有封奏事件希冀轉科朕用人自有權衡豈以一言爲去取况身爲言官藉以干進亦爲諸臣恥之同日李殿圖請陸續刊刻開國方

略一摺此書見在纂輯告成後自當敬謹刊行若纂辦未完豈可

零星刊布然所言不過書生迂見尙不足深責是以止將原摺發還而王寬之奏爲明刑大體所繫不應妄陳若此著交部議處將此通行傳諭知之○明亮舒常奏扎烏古第一條山梁經官兵占據其第二山骹在隔河勒烏圍之北第三山骹與勒烏圍相對下與阿爾古相接非惟礪卡層密且沿河一帶俱係懸崖賊人俱據險以待惟查兩山骹中間夾有深溝有一綫可通之路必須攀崖附葛而行雖極爲冒險諒向來賊人力量不過能守一面或轉可以出奇制勝隨令奎林和隆武阿爾薩朗等挑選兵丁分爲三路加派可信降番在前引路密從溝內進發仍於迎面派令都爾嘉等攻取扎烏古上截山梁珠爾格德等攻取扎烏古下截山梁尙有四處礪卡派參領額爾伯克侍衛進財保分爲兩路攻取臣等

率同前進德赫布及噶塘布等先於什扎古琅谷兩處統眾努力
攻撲賊人方當放槍滾石而奎林和隆武已由溝內直上山頂賊
人於設想不到之地忽見此一路官兵先已慌亂所有第三條山
腰礮卡隨到隨克而都爾嘉珠爾格德卽乘勢分搶礮卡額爾伯
克進財保亦將山半礮卡全行攻克各路合兵復分爲兩路一由
扎烏古上攻直至相近日斯滿而止一由扎烏古下壓直至相近
阿爾古而止諭軍機大臣等據明亮等奏官兵將扎烏古山梁全
行攻克明亮舒常如此奮勉庶覺略增顏面見在正可乘勝深入
而納木迪斯底葉安等處攔截在內並可不攻自潰此一路官兵
聲勢日盛大有起色至逆酋索諾木常在甲雜賊寨居住其地在
河之西與明亮軍營相近明亮等將河西一帶礮卡勦蕩肅清之
後若能統兵徑赴甲雜攻圍賊寨將索諾木及其得力頭人槩行

摺稱其功亦不爲小庶可與阿桂等同膺渥眷明亮等當努力爲之○癸亥諭軍機大臣等昨因高秉家內查出皇明實紀一書內多悖逆字句應行銷毀其書係東莞人陳建所著已諭令該督等細查所有刷印之本及刻板一併奏繳是書又名皇明通紀恐刻板或有兩副應一併查明繳進至澹歸徧行堂集語多悖謬必應毀棄卽其餘墨蹟墨刻亦不應存著李侍堯等逐一查明繳進並將所有澹歸碑石亦卽派誠妥大員前往椎碎推撲不使復留於世聞又聞丹霞山寺係澹歸始闢而無識僧徒竟目爲開山之祖謬種流傳實爲未便但寺宇成造多年毋庸拆毀著李侍堯等卽速詳悉查明將其寺作爲十方常住削去澹歸開山名目官爲選擇僧人住寺經理不許澹歸支派之人復爲接賴該督等務卽妥辦覆奏所有高秉家查出澹歸詩集及各種墨刻並著鈔寄李侍

堯等閱看此外或有類此者並著一體查辦將此再行傳諭知之
○甲子諭阿桂等奏官兵攻搶西里山梁黃草坪擊柵占據並攻
打科布曲山散在事之將領弁兵實屬奮勉據阿桂奏見擬直上
山梁之頂橫截賊人礮寨中間一得此處地下皆可迎刃而解阿
桂調度得宜自可乘勢席捲迅奏膚功○丁卯明亮舒常奏扎烏
古爲河西喫緊門戶經官兵盡行占據納木迪官寨賊人於前晚
自行焚棄相近寨落一空惟其上斯底葉安共有寨落三十餘處
見我兵擊柵與阿爾古相接雖有木城無難攻克但西北一角未
及肅清卽向南徑趨未免後顧可虞應先於斯底葉安一路進攻
隨令侍衛進財保參領額爾伯克等由扎烏古下壓副將全保遊
擊常格等由琅谷衝進將斯底葉安悉行占據因曲碩木寨落隱
於西面山溝之內未經掃除惟日斯滿別起山峰賊礮林立見擬

日內務期克取則甲索以下聲勢尤爲聯絡諭軍機大臣等明亮等奏連日攻克日斯滿以下山梁礪卡並納木迪官寨斯底葉安一帶地方均已掃洗覽奏欣慰日內想早已得手自可酌抽基木斯丹當噶一帶防兵並爲打仗之用又據奏稱我兵擊柵下與阿爾古相接雖有木城擋路亦無難以次攻克等語而投番阿旺亦供索諾木派人到阿爾古去把守是其地尙係賊人所注意明亮等當設法攻取使賊失其所恃官兵更可乘勝深入徑攻甲雜賊寨擒獲逆酋用膺茂賞明亮等務須奮勉力攻○己巳諭甲申歲我國家既定鼎京師而明福王朱由崧爲南京諸臣迎立改元首尾一載其後唐王朱聿鍵桂王朱由榔相繼稱號者又十有餘年當時以其事涉本朝開創之初凡所紀年號例從芟削卽朱璘之明紀輯略亦以附三王紀年爲浙江撫臣等所奏毀茲以接訪遺

集外省奏進此書閱其體例非不尊崇本朝且無犯諱字蹟徒以附紀明末三王自不宜在繫禁之列前命編纂通鑑輯覽館臣請不錄福王事實因念歷朝嬗代之際進退予奪繫乎萬世公論若前代偏私袒徇之陋習以曲筆妄爲高下朕實鄙之卽如福王承其遺緒江山半壁疆域可憑使能立國自強未嘗不足比於宋高宗之建炎南渡乃孱弱荒淫自貶顛覆而偏安之規模未失不可遽以國亡書法絕之特命於明崇禎末附紀福王年號仍用雙行分注而提綱則書明以爲別至蕪湖被執始大書明亡蓋所以折衷至是務合乎人情天理之公也至於唐王桂王遁迹閩滇苟延殘喘不復成其爲國正與宋末曷昞二王之流離海島者相類是以輯覽內未經載入今思二王究爲明室宗支與異姓僭竊者不同非僞託也且其始末雖無足道而外竄事蹟亦多有可攷與其

聽不知者私相傳述或致失實無稽不若爲之約舉大凡俾知二王窮感情形不過如此更可以正傳聞之譌舛又其下諸臣以一旅拒王師者向多以僞官目之然其間如白文選李定國等本獻賊義子反側無常彼在明已合稱賊稱僞自當準春秋書盜之例又如金堡等之五虎橫行把持國是者亦無足齒錄若其他各爲其主始終不屈以致隕首捐軀者不一而足較宋末之文天祥陸秀夫賈相彷彿雖混一之初兵威迅埽不得不行抗命之誅而諸人瑣尾閒關有死無貳洵無愧人臣忠於所事之義迄今日久將遂泯沒朕甚憫之亦宜略爲紀錄使之有傳於後設以爲載筆有體則凡事涉二王者不妨直以彼字稱之用存偏正之別而其臣則竟書爲某王之某官某槩不必斥之爲僞也明紀輯略已命有司弛其禁而通鑑輯覽校刊將竣其令四庫全書館總裁詮敘唐

桂二王本末別爲附錄卷尾凡彼時仗節死義之人考訂事蹟悉與備書朕將親爲裁定宣付刊行俾讀者咸知朕大中至正未嘗有一毫私意偏倚其間而崇獎忠貞亦足以爲世道人心之勸書成卽以此諭同御製輯覽原序並冠卷端庶將來有所參考喻朕意焉○諭戶部奏軍營病故乏嗣人員請照陣亡之例准以獨子立嗣一摺已依議行矣獨子不准出繼本非定例前因太僕寺少卿魯國華條奏經部議准行但立繼一事專爲承祧奉養固當案照昭穆之序亦宜順嫡婦之心所以例載嗣子不得於所後之親准其另立實準乎情理之宜也至獨子雖宗支所繫但或某人已死而其兄弟各有一子豈忍視其無後且見存者尙可生育而死

者應與續延卽或兄弟俱已無存而以一人承兩房宗祀亦未始非從權以合經又或死者有應襲之職不幸無嗣與其拘泥獨子

之例求諸遠族何如先儘親兄弟之子不問是否獨子令其繼襲之爲愈乎嗣後遇有孀婦應行立繼之事除照例案依昭穆倫次相當外應聽孀婦擇其屬意之人並問之本房是否願繼取有合族甘結卽獨子亦准出繼庶窮簷得以母子相安而立嗣亦不致以成例阻格該部照例辦理著爲令○諭據富德奏派副都統舒亮等於本月初七日夜分路統兵往攻布咱爾尼山梁中間崖洞官兵奮勇突前向洞內拋擲火彈賊人猝不及防各兵擁進洞口刀槍並施殺賊六七十人餘皆帶傷而竄拏獲活口四名割取首級三顆耳記五箇並於初九日夜間派舒金泰等進攻復搶得賊卡二座等語此次攻勦布咱爾尼崖洞富德調度有方官兵皆鼓勇克捷甚屬可嘉參贊富德俟大功告成後一併從優議敘所有在事出力之將領弁兵等俱著富德查明咨部議敘○庚午諭慶

恆前署鑲藍旗蒙古都統時未能查出參領額爾奇木等冒領滋生銀兩一事將郡王降爲貝子朕昨閱舊檔見伊高祖岳託爲國宣力頗立軍功且慶恆之罪尙屬因公慶恆著加恩仍賞給郡王以示朕軫恤宗勲至意○諭據阿桂等奏官兵搶上西里山頂擊柵截斷賊人攻克上下礮寨等因一摺內稱初九初十官兵連擊木柵十座相距山頂已近十一日巳午間派兵三路向上直攻海蘭察福康安等繞出木城從賊背後施放槍箭自上下壓賊人手足無措當將木城克獲殲戮甚多十二日又擊木柵八座據守山梁賊人不能來往十三日築起礮臺兩座分隊進攻十四日子刻烏什哈達等帶兵突然衝出克大礮三座木城四座福康安等又分頭攻克大礮兩座木城兩座殺賊更多並搜得槍矛等物見於十五日復將阿穰曲山駁寨落攻取一處擊柵十四座以期迅速

擣巢等語覽奏深爲欣悅此次官兵奮勇克捷皆由將軍參贊等調度董率有方統俟大功告成一併交部優敘其在事出力之將領弁兵等著阿桂卽行查明咨部分別議敘○賜原任工部尙書裘曰修之子行簡內閣中書准一體會試○壬申明亮舒常奏日斯滿山頂上共十七峒其山險峻異常日斯滿南另拖山駁一條地名耳得谷卽爲上巴布里尙有中巴布里下巴布里再下卽阿爾古沿山寨落甚多惟耳得谷最爲扼要自應先行攻取當派奎林和隆武統兵四面合圍第一處寨落賊番皆被剿戮復殲斃頭人錫拉木其第三處寨落望風潰散惟溝內之賊屢次衝突上山皆被阿蘭保督兵力戰殲斃餘始潰散竊念賊人所以死據日斯滿而不棄者不過欲爲我後路之患今其後路轉爲我兵所據是日斯滿以至巴扎木一帶峒內賊人諒再不能支持況上巴布里

既已攻克中巴布里下巴布里無難乘勝掃除阿爾古正如破竹之勢迎刃而解諭軍機大臣等明亮等奏攻克耳得谷卽上巴布里一摺覽奏欣悅此次攻奪耳得谷賊寨奎林和隆武甚爲奮勉而截殺衝突上山滋擾之賊阿蘭保進財保等頗爲出力著明亮存記統俟大功告成咨部議敘至額森特雖未親身攻勦立功而於隔河施礮轟礮使賊人膽落如此不分畛域方無愧爲參贊益當努力自勉共襄大功

十一月丁丑阿桂豐昇額海蘭察額森特奏阿穰曲寨落三處業經攻得其二惟將至河沿之第三座寨牆甚厚賊人聚集死守臣等商酌以索隆古一帶路徑頗多官兵從此搶上必須厚集兵力方可分頭攻打今卽使攻克第三座寨落而第二山峰等處之賊儻未肯卽時潰散則前敵之兵均難抽撤於直上索隆古分頭搶

壓之計斷不能行究不如將第二山峰木城攻克則直壓至山巖之下勢等建瓴此處賊人俱可埽盡而自科恩果木以下至卡布角各寨亦不攻自潰既無他顧之虞便可抽兵數千搶占前進諭軍機大臣等覽阿桂等奏所籌大有把握自即可望得手看來賊人全力專注西里一帶今阿桂等相機進攻自可乘勝克捷而噶拉依賊寨據投番等所供見甚空虛攻之自易爲力是埽蕩噶拉依賊巢惟盼阿桂等一帶之迅速蕲事至河西一帶賊既不能抽兵相助則攻取亦不甚費手今又聞索諾木仍在甲雜而土婦阿倉等見在雍中喇嘛寺明亮等若攻克阿爾古卽馳往甲雜勦擒逆酋並乘勝攻占獨松兼可杜賊眾西竄之路彼時或馳赴阿桂處幫同埽平噶拉依或渡河攻打雍中喇嘛寺擒獲阿倉阿青等則賊勢更孤明亮等卽可由彼處與阿桂約會夾攻噶拉依巢穴

自更可期迅速集勳○己卯賜原任刑部侍郎贈尙書錢維城之子中銑內閣中書准一體會試○以達敏爲內閣學士

由太常寺少卿遷

○庚辰諭軍機大臣等明亮等奏官兵見自甲索日斯滿扎烏古下及臨河俱已攻克官軍屢次克捷勇氣倍增見在攻勦乃當迅望得手聞索諾木又在甲雜居住若明亮等果能乘勝深入直抵甲雜將逆酋擒獲則噶拉依賊巢及馬爾邦等要隘礮卡皆傳檄而定無庸復煩兵力設攻得甲雜逆酋仍復竄回巢穴又當以堵蕩噶拉依爲要將兇渠逆黨盡行擒縛檻解獻俘方能蕝事明亮等至時當酌量情形如阿桂之兵已逼近噶拉依明亮等迅速過河攻打雍中喇嘛寺與阿桂兩面夾攻賊巢則勦除自更迅捷若阿桂尙未抵噶拉依而明亮等已攻克甲雜獨松又不妨先由河西往馬爾邦一帶迎進富德之兵過河同勦賊巢三路合力攻圍

賊更不能支延久拒尤可望剋期集事明亮總當安酌而行又另
摺奏綽斯甲布土司雍中旺爾結添人協剿踊躍從事土舍綽爾
甲木燦進攻尤爲出力甚屬可嘉著傳旨賞給御用大荷包一對
朝衣料各一件大段各一匹雍中旺爾結小荷包四箇綽爾甲木
燦小荷包三箇並諭以此等貴重服飾不獨番地難得卽在內地
臣工亦不能輕得大皇帝因爾弟兄誠心效順特加優賚以示鼓
舞爾等惟當倍加奮勉速助成功將來隨將軍等凱旋入覲大皇
帝自必另沛渥恩用昭嘉獎其土婦澤旺拉木並著賞蟒段一匹
大段一匹交伊等一併祇領齋往○壬午諭朕恭閱舊滿洲檔冊
太祖太宗初創鴻基闢取輿圖甚廣卽如葉赫烏喇哈達輝
發那木都魯綏芬尼瑪察錫伯瓜勒察等處皆在舊滿洲檔冊之
內雖在東三省所屬地方因向無繪圖竟難按地指名歷爲考驗

邇來平定準噶爾回疆等處時朕特派大臣官員將所有地方俱已繪圖昭垂永久 列祖初開鴻業式廓疆圉豈可轉無繪圖著恭查滿洲檔冊詳對盛京志 實錄繕寫清單札寄盛京吉林黑龍江將軍等各將省城爲主某地距省城幾許見今仍係舊名或有更改並有無名山大川古人遺蹟逐一詳查三省會同共繪一圖呈覽○癸未諭崇獎忠貞所以風勵臣節然自昔累朝嬪代於勝國死事之臣罕有錄予易名者惟我 世祖章皇帝定鼎之初於崇禎末殉難之大學士范景文等二十人特恩賜諡仰見 聖度如天軫卹遺忠實爲亙古曠典第當時僅徵據傳聞未暇徧爲搜訪故得邀表章者止有此數迨久而遺事漸彰復經論定今明史所載可案而知也至若史可法之支撐殘局力矢孤忠終蹈一死以殉又如劉宗周黃道周等之立朝審諤抵觸僉壬及遭際時

艱臨危授命均足稱一代完人爲褒揚所當及其他或死守城池
或身殞行陣與夫俘擒駢僂視死如歸者爾時王旅徂征自不得
不申法令以明順逆而事後平情而論若而人者皆無愧於疾風
勁草卽自盡以全名節其心亦並可矜憐雖福王不過倉卒偏安
唐桂二王並且流離竄迹已不復成其爲國而諸人茹苦相從舍
生取義各能忠於所事亦豈可令其湮沒不彰自宜稽考史書一
體旌謚其或諸生韋布及不知姓名之流並能慷慨輕生者議謚
固難於槩及亦當令俎豆其鄉以昭軫慰嘗恭讀我 太祖實錄
載薩爾滸之戰明楊鎬等集兵二十萬四路分出侵我興京我
太祖 太宗及貝勒大臣等統勁旅數千殲戮明兵過半一時良
將如劉綎杜松等皆歿於陣近曾親製書事一篇用揚 祖烈而
示傳信惟時王業肇基其抗我顏行者原當多爲獮薶然述其冒

鏑鏢鋒竭忠效命未嘗不爲嘉憫又若明社將移孫承宗盧象昇等之抵拒王師身膏原野而周遇吉蔡懋德孫傳庭等以聞獻蹂躪禦賊亡身懷懷猶有生氣總由明政不綱自萬厯以至崇禎權奸接踵閭閻橫行遂致黑白溷淆忠良泯滅每爲之搔腕不平福王時雖閒有追諡之人而去取未公亦無足爲重朕惟以大公至正爲衡凡明季盡節諸臣旣能爲國抒忠優獎實同一視至錢謙益之自詡清流覲顏降附及金堡屈大均輩之倖生畏死詭託緇流均屬喪心無恥若輩果能死節則今日亦當在予旌之列乃旣不能捨命而猶假語言文字以圖自飾其偷生是必當明斥其進退無據之非以隱殛其冥漠不靈之魄一褒一貶褒貶昭然使天下萬世共知準情理而公好惡以是植綱常卽以是示彰瘡凡諸臣事蹟之具於明史及通鑑輯覽者宜各徵考姓名仍其故官予

以諡號一準 世祖時例行其令大學士九卿京堂翰詹科道集

議以聞○甲申以董誥爲工部右侍郎

由內閣學士遷

○乙酉諭朕以福

祿係班第之子特加恩擢用侍郎派往西甯辦事伊應感激朕恩益加奮勉乃抵西甯以後諸事糊塗卽青海公禮塔爾被戕一案未能審出實情惟信禮塔爾下人一面之詞顛覆了事殊不勝任福祿著革職發往伊犁充當苦差自備資斧效力贖罪○丙戌定奉天山東沿海州縣文武員弁失察流民私行渡海例○己丑諭據阿桂等奏官兵攻打西里第二山峰地名奔布魯木乘夜督兵拏柵而進卽於柵內轟塌賊碉兩座初二三等日復派剿官兵赴山巖盡處合力攻打海蘭察等帶兵直取奔布魯木山峰木城福康安等所帶三隊官兵分頭搶撲賊人抵死拒守槍石交下隨拋擲火彈百餘時方大風火勢蔓延燒及木城官兵乘勢騰踊而上

賊人踉蹌奔出官兵緊追截殺殲斃甚多並因趕急滾崖跌死者
又復不少其不敢逃出者俱斃於內福康安等復攻入各碉內放
火焚燒官兵四面合圍碉內賊人亦均斃於火嗣後三隊合兵自
上壓下將西里正寨及寨後山包並迤下山骹各碉卡隨攻隨克
直至溝邊額森特等復攻撲山骹盡處木城亦經克獲並得雅瑪
朋寨前兩碉進圍雅瑪朋寨落相機即可搶上科布曲索隆古等
處連日共攻得木城九座大寨四座石碉七座石卡數十座殺賊
百餘人所得槍矛等物甚多等語覽奏深爲欣悅此等皆促浸要
隘賊人恃險死守將軍等多方籌畫調度合宜屢戰克捷實屬可
嘉見在大功指日告成將軍等自當特膺懋賞所有先登制勝之
參贊海蘭察及帶兵勇往之領隊大臣福康安均著交部議敘其
隨從分隊打仗出力之滿漢屯土各兵並著將軍等查明賞給一

各書進呈朕詳加披閱內宋劉跂學易集十二卷擬請刊刻其中有青詞一體乃道流祈禱之章非斯文正軌前因題胡宿集見其有道院青詞教坊致語之類命刪去刊行而鈔本仍存其舊今劉跂所作則因服藥交年瑣事用青詞致告尤爲不經雖鈔本不妨姑存刊刻必不可也蓋青詞迹涉異端不特周程張朱諸儒所必不肯爲卽韓柳歐蘇諸大家亦正集所未見若韓愈之送窮文柳宗元之乞巧文此乃假託神靈遊戲翰墨不過借以喻言並非實有其事偶一爲之固屬無害又如時文爲舉業所習自前明以來通人擅長者甚多然亦止可聽其另集專行不宜並登文集況青詞之尤乖典故者乎再所進書內有擬請鈔錄之王質雪山集內如論和戰守疏及上宋孝宗書諸篇詞旨剴切頗當事理竟宜付

之剗刷但其中亦有青詞一種並當一律從刪所有此二書著交該總裁等重加釐訂分別削存用昭評騭之允至見在纂輯四庫全書部帙計盈數萬所採詩文別集既多自不能必其通體完善或大端可取原不妨棄瑕錄瑜如宋穆修集有曹操帳記語多稱頌謬於是非大義在所必刪而全集或當錄存亦不必因此以廢彼惟當於提要內闡明其故使去取之義曉然諸相類者均可照此辦理該總裁等務須詳慎決擇使羣言悉歸雅正副朕鑑古斥邪之意○庚寅諭順天府尹劉純煒見在交部議處例應降調府丞卜甯一亦具呈告病順天府事務不可無人辦理蔣錫棨昨歲獲罪之案固所自取今事隔年餘伊亦頗知感愧自勵且念其前管府尹時尙能認真辦事蔣錫棨著加恩補授順天府尹此係朕格外加恩棄瑕錄用蔣錫棨務宜益加儆勉供職以策後效○辛

卯以胡高望爲內閣學士

由詹事選

○壬辰諭軍機大臣等明亮等奏

自礮占進兵攻得克爾甲爾古日格德木牛兩處礮卡見擬卽擊木柵就近攻打日蓋古洛相機深入所辦甚好若能乘勢壓下攻克乃當掃蕩甲雜則河西一帶卽可廓清且破其狡窟逆酋更無從竄逸佇聽捷音至前此額森特駐守勒烏圍於堵禦河西及科布曲一帶之賊責任甚重今額森特隨阿桂等進兵其勒烏圍惟留伍岱富興等看守富興本係病軀難以策其出力卽伍岱計畫調度亦未必及額森特之優見在阿桂軍營不但海蘭察勇略超羣其餘領隊大臣侍衛內能帶兵勇往者甚多可無藉額森特一人隨同進剿著傳諭阿桂卽令額森特仍回勒烏圍駐守嚴切防禦勿使河西之賊得以偷越設稍有疏虞惟額森特是問○甲午諭三法司覈議江蘇巡撫薩載題宿遷縣民劉俊強搶良家妻女

姦占擬以絞候自屬按律辦理惟將劉俊之父劉殿臣照爲從擬以杖流未爲允協劉殿臣係劉俊之父伊子告知欲搶孟池之女爲妻卽應嚴斥禁阻乃轉同往幫搶實屬悖理自有應得之罪若於其子犯案內照爲從問疑則名不正而言不順何可爲訓明刑所以弼教豈有定父兄爲子弟從犯之理此乃風化所繫讞獄者不宜掉以輕心海內之大億兆之眾良楮本自不齊如果父戒其子兄勉其弟使陷網者稀豈不甚善總因德教未臻上理朕方引以爲歎詎可不爲天下申明大義乎夫父兄之教不先已難辭不能約束之咎今劉殿臣明知其子強暴橫行反親往增勢以成其惡此卽敗類之尤不可不示以懲儆而律以爲從則斷不可著交刑部將父兄不能管束子弟轉同行加功者如何按本犯科條分別定罪之處卽行悉心妥議具奏此案俟議定後遵照辦理並將

此通諭知之○乙未諭軍機大臣等據李侍堯奏接淮安南國咨覆以毗連西省地方實無土物可以互市見在照覆停止等語奸民出境貿易易致滋生事端例本宜禁况近有張德裕等在安南開礦仇殺之案逃回民人甚多尤不可不整飭邊防盤詰禁止至定期互市之說原恐安南或有仰藉中國貨物之處難以全行杜絕因令以該督之意行知該國王酌議呈報覈辦今該國王既以互市爲未便則奸商更無從藉詞偷越邊境尤爲肅清惟當嚴飭沿途文武員弁實力稽查毋許一人竄逸並宜令該國王一體留心如有內地商民潛赴彼國者卽令其拘拏呈送該督辦理更爲周妥因令軍機大臣代擬檄稟寄交該督諭以該國送星廠有內地民人張德裕等聚眾滋事一案除該國拏獲解審並有陸續投回者甚多均經本閣部堂奏明分別嚴懲內地民人原不許私越

邊境况該國王素稱恭順此輩不安本分之徒尤不便聽其在爾境滋擾業經嚴飭沿邊各員禁止民人出口第恐爾國或有仰藉中國貨物之處若槩行禁絕恐於爾國生計有礙是以本閣部堂擬令民人在近邊互市俾爾國懋遷有資於整飭之中仍寓體恤之意因行文該國王查詢該處情形酌擬呈覆近據該國王覆稱以邊地民俗樸陋無須中州重貨互市之法恐爲虛設細籌良有未便等語爾國既無須內地貨物互市之法原可不行則邊境更得肅清於爾國尤爲有益因卽檄行照覆今已嚴飭沿邊文武員弁實力巡察稽查毋許一人出口並飭永遠遵行此次查禁之後設有匪徒潛行偷越仍至爾國逗遛者該國王卽行查拏呈送本閣部堂按法處治奸民自必益懷條教爾境亦得永臻甯輯該國王其遵奉毋忽將此傳諭李侍堯知之並卽照繕發往○丙申諭

軍機大臣等阿桂等派兵將舍勒固租魯相連碉寨悉行攻獲其
瓦剌占以上之寨亦經攻得並殲戮多人官兵自可乘勝直前搶
占科布曲山梁而豐昇額又親往勒烏圖前路相機合力攻打所
辦甚好至們都斯一帶賊番搬運木石思添碉卡拒守實爲可恨
見據阿桂用大礮轟擊賊眾自不能存亦可無虞其阻計阿桂日
內必當得手官兵若得科布曲索隆古山梁更爲得勢過此惟舍
齊喇嘛寺或尙有賊抗拒然官兵屢勝之後聲勢甚盛由彼下壓
噶拉依易如摧枯拉朽惟當努力妥辦迅奏膚功以膺懋賞○丁
酉命再撥部庫銀三百萬兩豫備四川軍務善後事宜○壬寅諭
阿桂等奏官兵連克舍勒固租魯瓦喇占雅瑪朋各碉寨並擒占
科思果木官寨埽清沿河卡布角一帶寨落等因一摺內稱連日
分兵勦壓共得賊人碉寨木城五十餘處殺賊二百餘人活拏賊

番四名所獲毬毬刀矛鳥槍等物甚多等語又據明亮舒常奏阿爾古一帶寨落悉行攻克等因一摺內稱派兵分路攻克卡寨痛殲賊眾賊人從河沿逃竄被官兵截殺直追至臨河或撈獲擒捉或用箭攢射賊人無一得脫共計生擒賊番八名割取首級耳記三十餘件殺死賊人二百餘名搶獲刀矛及什物等項無算等語覽奏甚爲欣悅此次兩路官兵各能爭先殺賊奮勇奪殲賊人已失險要不難指日蕩平皆由將軍參贊大臣等調度有方故能動合機宜同時克捷統俟大功告成特加茂賞其阿桂一路昨已降旨查明打仗出力各項兵丁賞給一月錢糧此次明亮一路出力之滿漢屯土各兵並著照前次阿桂軍營之例一體賞給以示鼓勵○癸卯諭喀什噶爾阿奇木伯克公噶岱默特與貝勒鄂對俱於平定回疆以前卽投至伊犁歸附且在葉爾羌喀什噶爾和闐

等處打仗頗覺奮勉著有軍功是以封爲貝勒公爵原非恩封可比其鄂對之貝勒噶岱默特之公爵卽著世襲罔替不必降等今噶岱默特病故公爵卽著伊長子阿布都爾滿承襲

十二月甲辰朔日有食之○丁未諭工部尙書閻循琦老成練達宣力有年洵厯正卿正資倚任前以染患膈噎特頒內府藥餌令其加意調攝冀得速痊茲聞溘逝深爲軫惜著加恩晉贈太子太保並派散秩大臣一員帶同侍衛十員前往奠醑所有應得卹典仍著該部查例具奏尋子祭葬諡恭定○調嵇璜爲工部尙書蔡新爲兵部尙書以曹秀先爲禮部尙書山東部左侍郎遷○戊申阿桂豐昇額海蘭察額森特奏查薩爾歪寨落共有三處對河有阿結占寨落兩處與薩爾歪隔河應援並卽在官兵搶上山梁道路之旁若不埽除則剋日上攻難免旁顧臣分派官兵同時並進直抵薩

爾歪將三處碉寨占據其隔河之阿結占寨落兩處亦經福康安等同時攻克諭軍機大臣等阿桂一路官兵每次進攻俱能克獲碉卡擒殺賊人甚爲欣慰卽當鼓勵我軍乘勝直搶科布曲索隆古以便迅擣噶拉依賊巢至明亮一路其勢尙不如阿桂一路之奮勇直前此時賊勢日蹙不特兩路將軍應同心併力務於歲內速成大功以膺茂賞卽富德亦當於此時相機進取俾在事官兵同霑恩澤以光奏凱旌庸之典○以劉秉恬爲吏部侍郎○辛亥子出師金川陣亡肅州鎮總兵曹順入祀昭忠祠○甲寅諭簡親王豐訥亨前在軍營甚爲奮勉承襲王爵以來諸事敬謹宣力勤勞茲聞薨逝殊深憫惻加恩著派縣德帶領散秩大臣侍衛等往奠茶酒尋予祭葬諡曰恪○以白瀛爲江西按察使○丙辰調熊學鵬爲廣東巡撫以吳虎炳爲廣西巡撫

信爲通政使全魁爲盛京禮部侍郎

由通政使遷

○戊午以李世傑爲

湖北布政使杜玉林爲四川按察使

由驛傳道遷

○庚申諭軍機大臣

等阿桂等將勒隈勒木通硯卡悉行攻克殲賊甚多將軍及將士等並皆實心出力朕深爲嘉慰惟是見攻之科布曲索隆古兩處山梁卽能剋期得手尙隔舍齊喇嘛寺一隘方能直搗噶拉依或官兵乘勝深入賊眾難以復支埽穴之功易如破竹自屬最善阿桂等務當仰體朕意努力速爲之○甲子諭據明亮等奏由達撒谷進兵連克三道險要山梁已將沿河格爾則寨落一併攻取通計攻得賊人大寨落五十餘處木城硯卡三十餘座搶獲鐵礮及鳥槍刀矛什物甚多殺賊百餘生擒賊番二名等語覽奏欣慰官兵等鼓勇直前攻堅殺賊甚爲奮勉亦由明亮舒常等調度有方故能所向克捷痛加剿洗均屬可嘉其副將軍參贊統俟大功告

成特加茂賞所有帶兵之各領隊將弁等著查明咨部議敘其派出越險攻碉之索倫吉林及綠營官兵二百四十名及隨同分隊出力之屯練土兵並著查明賞給一月口糧以示鼓勵○丙寅諭據阿桂等奏官兵攻克格隆古科布曲索隆古們都斯得木巴爾一帶山梁碉卡寨落並乘勢搶占安布魯木山峰碉卡見由索隆古進攻卽期迅擣賊巢等因一摺覽奏深爲欣悅此次攻克賊人大碉寨一百餘處獲礮九尊鳥槍刀矛等無算殺賊二三百名拏獲活賊二名官兵等越險直進鼓勇摧堅所殲醜類甚多且扼賊人要隘皆由將軍等調度合宜參贊及諸將領等董率銳進官兵並能奮勇出力均極可嘉而所得勞績亦較前數次更大阿桂豐昇額海蘭察額森特及在事之將領弁員等俱著交部從優議敘以示獎勵仍俟大功告成另沛酬庸渥典○己巳諭據明亮等奏

本月十四日分派官兵攻克獨古木上下寨落乘勝搶占乃當之布吉魯達那兩道山梁等因一摺覽奏深爲欣悅此次攻克山梁焚燒上下寨落八十餘處生擒番童二名殺死賊人一百餘名搶獲鐵礮一位將領等均屬奮勉而奎林和隆武尤鼓勇先登懋著勞績各官兵亦皆踴躍思效銳氣倍加皆由將軍參贊調度有方用能所向克捷甚屬可嘉明亮舒常及在事打仗出力之將領員弁等俱著交部從優議敘仍俟大功告成另沛渥恩以酬勲績○庚午諭阿桂等奏官兵由索隆古進攻所向克捷見據噶占山梁整兵直搗噶拉依等因一摺據稱於本月十三日分派將領帶兵進攻各官兵一呼直前先將克爾納古車整里達爾卓克三處碉卡木城均行克取遂從山坳繞道攻開賊匪所積樁木一面留兵占據山梁一面越過山巖直取甲木爾復回攻朗阿古碉寨衝上

山梁克獲得拉古碉卡截殲賊匪甚多又分頭攻取布哈爾地方
占奪則朗噶克梁上了口各碉同時並攻得庫爾納達爾納達爾
卓克氣什機等寨復由則朗噶克丫口下至溝底將噶爾噶木勒
烏果木得克聶烏各寨落悉行焚燒連日又將軍庫爾納額木里
多巴斯科得里角噶占馬爾角等處並皆克取共攻得官寨三處
碉寨四五百處搶獲九節礮一尊鳥槍刀矛等物無算殺賊甚多
官兵見駐噶占山梁於一二日內順梁下壓直擣噶拉依賊巢已
有摧枯拉朽之勢又另摺奏有頭人色木里雍中願爲官兵內應
望塵跪迎並有大頭人布籠普阿納木帶領所屬寨番男婦千餘
來降各等語覽奏深爲欣悅此次官兵爭先殺賊奮勇進攻連日
克獲賊人碉寨甚多見在乘勝深入直擣賊巢且逆酋平日所恃
之大頭人亦率屬出降可見賊中勢已瓦解指日可期埽穴擒渠

皆由將軍參贊等調度有方故能動合機宜屢戰克捷而海蘭察尤勇略超羣諸將領並皆奮勉出力實屬可嘉著將阿桂豐昇額額森特及領隊大臣並將佐員并俱交部從優議敘以示獎勵仍俟大功告成再沛酬庸茂典○王申諭明亮等奏官兵連日克甲雜並後路巴布里日蓋古洛一帶全行勦洗乘勝進抵獨松隘口克日會擣噶拉依等因一摺覽奏深爲欣悅甲雜爲賊人往來狡窟昨阿桂攻占噶占山梁進逼賊巢已成破竹之勢今明亮復將河西甲雜一帶後路將及百里全行掃蕩肅清即可統兵渡河直取雍中喇嘛寺賊酋更無竄身之地並有大頭人達固拉得爾瓦率領乃當番眾五百餘人投降爲官兵內應擒獲土舍庸中旺嘉勒及邁布星根來獻又喀拉頭人思達爾結亦率屬六百餘人來降搶獲礮位鳥槍火藥子鉛甚多此皆將軍參贊調度督率有方

諸將領官兵亦各奮勇出力用能屢戰克捷實屬可嘉著將明亮
舒常及領隊大臣將佐員弁等俱交部從優議敘以示獎勵大功
指日告成俟紅旗遞到再沛酬庸渥典○予出師金川陣亡之通
判吳景副將佛遜頭等侍衛敦柱等入祀昭忠祠○是歲朝鮮琉
球來貢○會計天下民穀數各省通共大小男婦二萬六千四百
五十六萬一千三百五十五名口各省通共存倉米穀三千九十
五萬八千九十石四斗五升七合